



溧水縣志卷之六

名宦傳

唐

岑仲林鄧州人字書令文本之孫為令有政績時
兄羲令金壇仲翔令長洲皆有聲宰相宗楚客
囑監察御史曰勿遺江東三岑仲林居溧水元
見表樹不媿家風

王通字玄覽長壽間任增益戶口以清勤名
竇叔向金城人以左拾遺知溧水優於治善屬文



其子常牟群庠輩五人咸秉訓誨成顯宦而叔
向之政獨著世以五寶稱叔向寔先之

白季康太原人父麟爲揚州錄事母夢感白蛇而
孕生其先秦武安君起數傳至公生而溫恭信
厚爲官貞白嚴重始任華州下邳尉及歷宦溧
水已四爲令矣而竟卒于官邑民思而置豆之
不衰遂爲神卽本邑城隍是也迄今禳禱輒應
邑民尊崇之視他邑特異焉公之生平詳于從
子居易墓志有云公才不偶時道屈于位命
曷知其快快未試之志猶炳烺千禩而不滅哉
陸該吳縣人象先孫也爲令倬有時譽

宋

關起字蔚宗崇寧二年以太子中允出知溧水縣
機務整飭肇興學校任滿擢廣西常平太守

周邠字開祖元豐四年任節儉愛民民德之

李衡字彥平江都人紹興中進士隆興元年任博
學能文操筆立就專以誠意化民注情學校諸
生向風累官至副御史改起居郎以秘書脩撰

致仕

周邦彥字美成錢塘人元祐八年任雅嫻于文詞
一時稱爲才吏在縣作蕭閒堂插竹亭題名諸
記及他什甚富而不妨于政其爲人落魄不羈
多涉經史先是元豐中獻汴都賦萬餘言多用
古文奇字神宗異之自諸生召爲太學正後至
徽猷閣待制知順昌府有文集二十四卷行于
世

張革大觀二年任才而有操以強明清白稱

潘振建炎間任爲尉會金人攻建康陷溧水振獨
死之

李朝正字治表由太學登第歷勅令所刪訂官經
興間出知溧水縣有異政秩滿民泣畱葉夢得
薦于朝高宗曰近時縣令以政績被薦輒別除
差遣莫若進秩久任之庶幾民安其政乃召對
遷一官賜五品服遣還陛辭乞易所得章服封
母從之戶部侍郎王鈇復薦之言朝正昨任溧
水縣曾措置均稅簡易不擾至今並無詞訴除

太府寺簿累官至戶部侍郎奉祀調知平江府
卒年六十官至朝奉大夫

章籍浦城人樞密衡之孫紹興間任爲政清勤且
平易而法不撓民頌之

姚耆宗紹興十五年任愛民戢吏詳明不苛邑稱
大治

蘓楷字彥平隆興元年任強明有吏術諸司列薦
召知江陰軍

司馬僖字季和溫公光之後淳熙三年任明敏有
才爲政不苛

吳友聞淳熙十六年任清勤詳察獄折片言

湯詵字伯行丞相思退之孫嘉定二年任存心仁
恕民共戴之見于塗歌

史彌鞏字南叔鄞縣人嘉定進士丞相浩之從子
丞相彌遠之從弟紹定元年任爲人好學強記
性剛介而政精明人服之首嚴庠序累官提點
江東刑獄歲太旱活饑民百餘萬後知婺州卒
年八十真德秀嘗稱其皦然不污

衛社紹定四年任清而仁民悅之

元

儀武義元貞初任溧水州修建學校易齋扁鑄祭器煥然一新

李衡至元元年任溧水州政務既舉乃修學宮益生徒建尊道明德二堂以誘後進

明

郭雲隨州人洪武二年任溧水州尋改知縣會兵燹之後邑甚凋敝雲至力任之建置縣署百廢具興而益持以廉士民咸悅後以勞力謀略被召改爲南陽衛指揮撫綏軍民俾以樂業子孫世襲其職

高謙甫温州人洪武五年任徵收不擾差役均平以廉能稱

賈貞廣平人永樂間任廉明守已蒞政有方

鄭仲源臨海人永樂十年任公勤處事謙讓自持有明敏才而退然不居

燕壽字本仁咸寧人成化間由舉人任臨寧以莊

退居無惰容簿書秩然政平訟理吏不能欺民鮮不法後丁艱去衆深惜之

韓和字介之江西鉛山人天順間由舉人任教諭嘗倡新學宮置祭器甚備而無少污也上官委以定徭賦衆皆服議者謂韓先生又優於吏如此無何竟致仕去人益嘖嘖云

王弼字存敬黃巖人成化十一年任有操守富丁學催科以期而民無後之者歷興化太守

張璉順天府霸州人弘治間山吏員任縣丞偶儻

有大志而守甚介或諷云世方用人以格君

自苦爲也應之曰格能限璉官耳能限璉乎

陞州同不及赴而卒蕭然遺一囊也官爲之殮

嘗建泮宮坊永豐倉

後有張令名錫者其族子也

胡珥字朝重襄陽人由進士弘治十三年任愷悌得民惠政足紀

張錫字惟範由進士正德元年任寬猛相濟愛畏人民

陳憲字伯度餘干人由進士正德八年任公明寬

恕操潔廉平曾修溧水志

王從善字承吉襄陽人由進士嘉靖三年任藹然
愛民而老于吏治夙富文詞政舉其要首請忠
節祠祀祀齊節愍公建先斯倉以備賑濟公暇
則過興教寺翛然自適不爲俗務所拘顏寺中
堂曰又得義取又得浮生半日閒也每有訟民
卽寺聽斷視若無事蓋超超若世外者于諸生
多所嘘拂士人向風依戀省荒勸農多得古法

纂邑志今垂舊聞

高翀江西新淦人湖廣安陸籍由進士嘉靖七年
任廉明而威民無咎者

張問行字子書內黃人由進士以御史言事被謫
嘉靖九年任善察屢摘民間陰事呼爲神明宰
胡鳳字文明嘉靖間任廉而果敢

謝廷蒞四川富順人由進士以給事中嘉靖二十
年言事謫雲南尉尋調而至裁抑冗濫濟以廉
明去而民懷之

樂尚約膠州人由進士嘉靖三十年任在官多惠

政百姓懷之凡所修葺迄今皆指爲樂公遺澤
愛比甘棠有縣宰題名記暨正顯東岳廟碑見
藝文志

陳文謨字仲謀別號仰潭浙江慈谿人由進士嘉
靖四十一年任端方正直不阿不抗事上敢言
御下明朗使民通曉催徵得宜加以勸慰人盡
輸納恐後聽訟務使兩得其平詞無濫受罪弗
苛求民悉懷之建祠尸祝至今稱之順治十二
年春奉主入名宦其里已祀鄉賢若公者可謂
恭茂無媿者也仕終刑部郎

劉應雷江西萬安人由進士隆慶三年任時傍邑
有以糧數千石倖嫁溧水者公力爭致當道以
勝氣臨之執益堅決于納綬事竟直又丈量田
畝無尺寸漏因高下制賦克當見于歌謠被召
去卒于塗民懷厥德立祠祀之並入名宦事詳
傳御史應禎記

徐必達字德夫別號玄仗浙江嘉興府秀水人萬
曆壬辰進士初授太湖縣多惠政以丁內艱服

闕補溧水甫下車問民疾苦舉最重者莫如田
畝丈量之務先是明永樂初溧居蘓常上游吳
下每受湖水之患因築東壩以塞湖水爲吳都
利則溧害生南湖之漂沒汎濫十萬餘畝化爲
汪洋不可問糧稅矣前令陳子貞不得已以每
畝加鈔弓一分有奇以克前數則本代蘧民
不堪命且丁條二項悉重于他縣而協濟銀尚
三千餘兩措辦尤艱公心惻之比例高淳改折
以甦民困代邑民張曉等草疏使叩闈以請公

後歷遷至應天府尹操江都御史始終以溧爲
意每與諸當道激切言之卒獲改折皆公之力
也徵漕有法弗事煩刑不經胥役民自投櫃登
名因以驗其輕重民樂輸早完歲無逋欠聽訟
虛公使各盡其詞隨以片言折之無一寃者又
寬餒贖公移內開填百不及十與士子課文講
藝建圖南書院有期有禮士彬彬以興置學田
以贍貧生凡各上官經過供億之煩徃徃取辦
坊長公恤其苦乃於衙舍曠地蓄雞豚治蔬菜

以備陳獻累不及民上官亦習聞其賢而無有
苛責縣民楊保元駱應鵬等坐齊泰族黨編戍
軍四十五戶泰子孫蒙赦還而族黨遠戍者猶
故公爲力請豁籍且請恤錄裔孫以慰忠魂他
若恤馬戶佃草場修圩埂治街道與利除害不
可勝紀以行取去任後歷陞至南京應天府尹
長江故有牽挽水手歲計工食銀二千四百餘
兩寔則江帆風便無事此役公爲裁革以抵各
屬縣夫馬驛遞之應增者賠償之應恤者條案
井井撫按允行勒石著爲永規又捐俸三百餘
兩爲溧水增置學田凡可以爲溧計者莫不畱
意焉溧民至今頌之不衰公位至南兵部侍郎
終于家別有傳茲特褒其治溧之大畧焉

周起元字綿貞福建晉江人以解元登萬曆
辛丑科進士授番陽縣爲政有幹才考選御
史歷官太僕少卿巡撫應天凡屬郡縣民困
多所體恤于溧水改折一事公獨題疏力言
得報溧民戴之請祀名宦尋以事迂魏璫被

漢水縣志
害逮下詔獄死

附記

吳仕詮字公擇浙江湖州府歸安縣人萬曆初舉進士令溧水與尋常令異視溧之劇者爲簡變令之俗者爲雅動以文章飾吏治首崇學校作學記勒于學宮作訓民四箴立于堂壁士之爲文者以之風民之違法者以之勸政暇一意于山川文物虛賢下士以邑誌爲國史獨重其事考正德嘉靖二誌而重新之聘山人黃汝金纂輯以成而自序焉有功于溧者德惠不可枚舉至今人思之公寔于萬曆以後爲溧令者有觀感云

陳子貞字懷雲江西南昌人萬曆十六年進士令溧水以實心爲政愛民如子待士若師勸善簡訟講學課文不矜清儉不尚虛文在任相安有恩無怨邑祠祀之行取御史去旋督學江南巡試諸郡道出瀨上登徽恩閣賦詩題扁如歸故鄉不勝有感猶詢民苦士風一一不怠有長者氣度稱爲召父杜母官至福建巡撫所在有祠

永思無斃

徐良彥字季良別號若谷江西新建縣人登萬曆
戊戌進士初授婺源縣知縣丁內艱去服闋改
補溧水縣公才學政事動皆過人下車首權其
邑之要務莫大于便民杜害允行之應天八邑
俱有解京皇磚之役歲僉富戶轉解賠累甚重
多至破家大爲民害公心憂之因請于田糧少
增分毫不令偏累富戶議令各縣共出其費悉
付蘓州府慣燒磚式匠作摠解以免駁換之苦

議行而民便凡上官經臨一切供應什物皆借
辦于坊長臨期倉卒多致失悞不週往往吏民
相諉失禮上官公設處官置立爲定則不使貽
累坊長上下相安每年會計必清筭申明不使
胥吏得一毫影借其間聽訟不形喜怒使民情
得以上達而奸猾者悉無以自施其巧罪罰惟
輕贖鍰多免一意保護群黎公素知堪輿之理
每嘆溧水形勢有不足而易消長視東南諸水
直瀉無情西北風氣不聚倡義民建塔以塞水

漢水縣志
口于是民多豐饒士咸文秀萬曆丙午分校南
闈多收名士大宗伯錢謙益其首拔也居溧五
載所行多做前令徐公人稱溧有二徐焉行取
御史臺直言抗疏以忤魏璫被謫崇禎初起大
理寺卿尋陞工部侍郎予告歸有焚餘草詩六
卷行于世

朱身修字安伯江西進賢人由萬曆丁未進士任
溧水以愛民爲心不濫受詞坦然以農桑是勸
吏胥左右無敢一有犯者公不威而民畏有禮
而士親未期年而邑之利弊了然搜剔殆盡稱
爲神明擢南禮部主事轉南吏部考功司郎中
終于福建布政使邑有祠焉

張錫命號月沙四川潼川州人登萬曆丙辰進士
授溧水縣公眇一目邑人相戒百凡言語書字
俱慎之公畧無拘忌久之民亦相念公之聰察
纖毫不爽若有四目之明至論文閱試具特識
拔秀異焉邑有改折田糧事前令公歷歷申請
未獲報可公曰此已有成議不難力請于上而

爲民慰時值嘉興徐公任大京兆公亟乘機會
取邑民張曉前疏申而行之京兆公曰適獲我
心力懇撫按題請得折改如高淳例合邑歡呼
動地竭二十年之力賴公克收其成焉其他善
政不能備紀後擢南臺御史

李可埴字夔龍湖廣善化人由進士天啓二年任
溧水賦性淳良不爲察察與民相安至五年以
兵餉欲借改折暫徵公有伸免文移甫行而丁
艱去服闋補他縣惠政亦如在溧焉後擢戶部
陞鳳陽知府時楚寇亂不能歸以遺愛在溧水
遂家焉

曾就義字雙南江西贛州人由乙丑進士天啓七
年任居官多善政尤以摘奸爲精敏市徒夜聚
賭博至明則勾攝已在門矣賭風一杜自公始
民有以夥狀嚇騙良善者不遂其欲輒以無名
狀陰告各上司差役下鄉如虎狼經年不決公
廉得其狀必請于府且奮髯而起曰不活磔此
輩無以安良民也乃以丁艱去猶以未盡除此

害爲憾當公之時市棍莫不斂戢公之政不可枚舉舉其要者崇禎間破格甄用選入翰林然用掩其長矣

吳世濟字楫侯天啓丁卯舉人崇禎元年任教諭遇士有禮久而不懈曾署縣篆潔白有操不令人目爲代庖者陞大和縣去邑有祠焉

國朝

羅佳士字

北京

人由貢士順治二年任

時以新制各縣俱欲設鎮兵以防土賊公居此深察溧民淳良旣以歸服可無用兵馬恐騷動百姓力申上勿煩設鎮從之民大歡戴乙酉冬適鄰境土賊煽亂公加防守甫欲申報上而賊忽焚掠而去公挾印造府親道所由各上臺俱察非其過獨操臺有苛責下獄經年意有他也公付之不辨終置于法民盡悲之然却兵安民之心自昭日月也

楊國楨字

遼東景州人由旗下貢順治三年

任爲人廉明爽直兼長武略視事快便據案批

馭無弗中節兌運漕糧親臨倉所與運官運役
手執升合不得虧損糧長十二鄉莫不感戴無
何擢去官至監司

王鼎胤字六符山東淄川人由進士順治四年任
初履任卽赫赫有神明之譽時值丈量嚮之以
產相授受者率思藉爲訟端公概置不理民獲
以安邑之財賦積年爲奸胥侵蠹莫可稽覈公
嚴爲清算纖毫無容欺隱繼此者得不受蒙蔽
其貽後人之利多矣

安應晬字玉吾遼東人由旗下生員順治六年任
在官勤敏平和事無弗善時分防兵肆虐民苦
之至有殺人以祭馬神廟者公力請于上徙去
之自立鄉勇親以操練賊不敢窺且虛賢下士
逢丁祭必齋宿循禮早禱則徒跣額神立應雨
澤以勞瘁致病九年正月卒于官民建祠祀焉
名宦補遺

吳裕洪武間爲溧水令有聲上作褒賢頌送之此
見王禕造邦勲賢錄如此顯名異寵而前三志

俱未載官師表亦不列其名無乃疎乎故補入焉

忠節傳

宋

朱處登政和八年進士建延二年官左從事郎潭州瀏陽令四年軍賊杜彥等陷瀏陽處力戰三日死之湖南安撫司聞諸朝贈通直郎與其子柔嘉恩澤因嘉歷仕贈至大中大夫三世孫紹遠明遠四世孫用泰棟俱擢科第五世孫立之祐之以易學授徒于家處高祖壽昌揚州天長人七歲失母行求五十年得母完聚母卒泣涕

喪明有白鳥集其墓天下皆知其孝仕至司農少卿嗚乎處之忠節蓋有源矣

劉綰靖康間官安撫使金兵至綰以抗敵死其後曰應炎者任臺諫有聲挺立不附賈似道被謫拂衣歸隱克承先志

元

趙龍澤字萬里宋隱逸趙林之玄孫元鄉賢趙鑑之子爲人骯髒自負有司舉教授一就職卽謝去會汝穎兵陷建業龍澤不屈歿之子權亦從父歿弟雷澤長子棟婦夏氏次子楷與其婦劉氏弟宗澤之婦衡氏同赴水死獨雷澤與棟以他故得免議者謂趙氏上世多賢者何爲一旦酷烈至此嗚乎此正天之所以不歿趙氏一門者歟

明

齊泰原名德字尚禮別號南塘洪武二十年舉應天鄉試第一明年舉進士授禮部主事尋改兵部會雷震謹身殿上禱郊廟以泰官九載無過

得陪祀賜名泰三十年陞本部左侍郎明年進
尚書上召問邊將姓名泰歷舉以對無遺又問
諸圖籍泰袖出手冊以進大稱旨是年受顧命
時諸王方擁重兵專制多驕逸不法及建文君
嗣位詔諸王臨邸中毋奔喪兼殺諸王權詔下
諸王弗悅多啣泰已而文皇竟入臨泰請勅急
勒還國泰嘗使北平佯內其賂歸請爲邊費上
益倚重之初上在東宮意固不忘諸王太常卿
黃子澄嘗陳說漢七國事當上意至是議國事

必召齊黃云乃共建築有罪輒除國時有高巍
者諫止之其旨云陛下毋行晁錯削奪之謀當
從主父偃推恩之舉上善其奏然竟不行及周
王有罪文皇曲爲解諸臣皆曰燕固私周耳且
彼諸王何爲獨燕王有塞上功諸將素憚之奈
何不亟爲備于是數遣使廉燕陰事日急靖難
兵遂發時上方召學士輩沾沾弄柔翰討論周
官法度不暇給詔闔外事一付泰泰遂移檄指
斥削屬籍無所憚或難之卒不顧靖難兵亦遂

以誅秦等爲名上疏請發奸臣齊秦等臣願得甘心焉以報我高皇帝之靈臣卽罷兵與陛下更始否則兵且抵京赤地千里書數上不報後靖難兵臨淮聲大振上不得已謫齊黃官以報文皇請罷兵文皇曰此直鼠輩自全計耳能餌我哉趣兵益進上亦復召齊黃未及至金川門聞建文君已遜去秦追走廣德道遇修撰王叔英呼之曰秦乎若勿死而奔得無有異心乎秦慟曰吾志在後舉未敢死耳叔英亦慟曰秦乎休矣日者天下兵一付子子卒無能報國恩今事去矣顧纍纍然奔何爲哉雖然未死固子分也吾聞之古人云死節易吾姑爲其易者秦乎善自愛遂自殺秦復募兵他郡被執見文皇不屈死之先是秦嘗以將才薦謝貴授北平都指揮使及靖難兵至貴不屈死又嘗薦趙清守河南文皇以書招之不能屈謝貴嘗以坐事當死者趙清舊曾爲北平指揮秦皆能不疑而用之同時死難諸臣如牛景先盧振輩咸秦所信秦

兄弟敬宗宰俱以泰死子甫六齡倖免宗黨悉遣戍仁宗朝赦還仍給故業今邑東十里有尚書舖泰宅也嘉靖中知縣王從善謝廷蒞相繼爲祠祀之仍請以泰五世孫光裕補博士弟子員守祠光裕卽六齡兒後也萬曆十二年監察御史屠叔方接恩詔請恤豁泰族黨戍不報至天啟元年知縣張錫命仲應天府尹徐必達監察御史田題准豁免楊保元駱應鵬等四十五家回籍歸業泰謚爲節愍賜表忠祠勅縣官春秋祀之泰曾祖盈輔祖澤父仲榮贈如泰官

附傳

魏澤字彥恩少有學行洪武中官刑部尚書建文時謫爲海寧山別時文皇逮方孝儒械繫獄以姚廣孝言欲勿殺乃捕其族黨輒下獄以怵方而方卒勿屈故方氏族黨殆盡諸嘗善方者人人危懼莫不諱言方氏澤獨以一尉犯不測威傾身庇焉竟能存方氏後天下義之謝文肅所稱孫枝一葉者是矣後直指黃紀賢代巡至溧建

石碑于北門橋表澤大義知澤爲練城人在溧水分去高淳縣境高淳志載澤家世詳甚澤所著有綿山集藏于家

舊志吳仕諗曰魏澤無意於死建文君難而顧汲汲爲方氏後者何烈也豈其不欲此身以衆人死耶鄭莊簡乃附澤於死難諸臣後有旨哉澤過方故宅有悼詩載藝文志

武肅字元晦蒲村人父滋里中號爲長者肅幼孤棄舉子業長有丈夫氣嘉靖間由臺史授台

府知事時監司林應箕廉其能俾攝仙居再攝黃巖皆稱治辦兩邑士民交頌之會倭犯黃巖界肅率兵迎敵倭爲之却初所率兵猝募民間子弟雅勿習戰又以倭卽引去脩稍弛越五日倭突至城遂陷驛馳報監司不之譴益加顧勞曰吾頃聞于諸大夫如肅非棄城者吾將再試之肅感激自誓曰肅不肖無能一士卒心誠未敢以必勝許所可許者肅此身也遂毅然往禦倭於拗嶺以奇兵掩殺之至釣魚嶺倭亦以奇

兵還擊之衆潰晞獨殿與寇相持者越日手刃
若干級援勿至遂陣没年三十八聞者哀而壯
之監司上其事聞于朝及其子尚賓上書白父
死節狀上可其奏追贈晞太僕寺寺丞廕一子
命台州立祠祀焉賜額忠愍今溧水亦入表忠
祠祀之隆慶問子尚賓薦於鄉人稱食報云

舊志吳仕諡曰余觀建文君三歲而廢五王
未嘗不致憾於死節諸臣間然何至於崔銳
有云諸臣之罪卽死不足贖及觀泰之所以
遇高皇帝而其所推轂士槩以死報則知泰
非徒死者然而卒無功非天耶又嘗考建文
君所進用諸臣永樂間多以功名顯彼其時
非不炳然在識者觀之曾不身死而漸泯矣
乃若武曠起一掾耳竟能一死以成名使鄉
之人千百世而下稱齊武並烈云嗚呼亦難
矣

李佛保溧之有膽力人也居恒每以忠義自許不
事名利邑人不甚識之嘉靖三十四年海倭自

吳下登陸震驚東南犯溧境民衆惶潰保獨挺身捍之奮勇力戰勢孤不敵死于募軍橋惜前未有揚之者用書厥事

丁遵生而壯氣過人自負膂力與李佛保同時倭至懼邑民難出與佛保共奮盡力弗克遂死前志遺載今補焉

劉鳳池生有氣節斤斤自立茹素養身年始三十有一處世分明毫無欺僞聞崇禎甲申之變已誓死至乙酉度勢不可支引火自焚

六斤爲治命遂從容赴水以死及家人跡至其衣冠整然立于河中面貌鬚髮猶生邑諸生武維英爲文施必顯爲詩以吊之

國朝

劉虔邑庠生貌雄偉性慷慨寔文士而兼武略也順治二年乙酉冬十二月土賊倏起知縣羅佳士聞警捧印上郡請兵未及虔登城瞭賊賊已在樓櫓虔力拒羣賊揮刃失手賊攘虔刺死邑中士民痛哭哀之

朱諱良知號繩溪山陽鄉拾圖人崇禎拾肆年以
方正授浙江仁和鹽場

門州當陽

縣丞性伉爽有氣節喜讀異書猶精於地理著
堪輿掌鏡十二卷

鄉賢傳

宋

俞棨字祗若崇寧四年以上舍賜進士第一僉書
鎮南軍判官未赴改授辟雍博士秘書省正字
屢遷給事中勿合于時出爲襄陽府察鹿門寺
僧有敗行棨沒其田一半入官以助軍餉還拜
給事中上書論學校其言頗行又嘗言外郡之
切要者監司守令而已苟非其人則下有冤抑
何繇越而白天子哉上深嘉其言賜對衣金帶

會蔡京再相憾向所用事多畔已奏出知河陽
改開德府未幾轉拜御史中丞陳士風六弊又
發戶部尚書劉炳陰事京方倚炳與適戾其意
改翰林學士最後以毀紹聖法度被謫尋復述
古殿直學士知江寧府卒

按卓作俞氏釋褐題名記其祖考始儲六經
以詔昆裔越五十年始有釋褐而歸者自天
聖訖今凡十人非朝廷樂育之效與故相岐
公嘗以十榜傳家爲美卓誦其詩而悅之因
作十榜傳家記追念先澤刻石垂訓學者勿
嬉勿隨卓踵舊武以忠義報國益振家聲諸
科如良佐良彌瑛珏仲翁徹卓順迎次階布
次喬皆俞氏云記載藝文

魏良臣字道弼崇教鄉南塘人資資瑰偉少游郡
學歸母病已亟良臣剖股爲糜以進下咽卽安
間里稱孝宣和三年登進士第初授丹徒尉請
闕投匭伸太學陳東寃天下高其義徽宗南巡
上疏請還闕不報調嚴州壽昌令以縣最開召

對除敕令刪定官遷吏部員外郎金人犯高郵
擇使講和高宗曰魏良臣頗有氣節宜往會邊
臣開釁金人怒欲勿盟良臣曰初天子議未下
邊臣惟有死戰耳金人憚之與之盟而退遷除
禮部郎官遷左右司檢正秦檜當國欲畀以言
職力辭適金人敗盟擢吏部侍郎復奉使兀朮
擁精銳以懼之欲畫江爲界良臣毅然曰有國
書在且分淮而守定初議者卽某也其他非所
敢知反復持論迄定議如初于是秦檜忌之
知池廬二州檜死召參大政首請出衣冠之
歸蠻瘴之冤起淹抑斥姦回修軍政罷冗官節
浮費時政一新同輩咸爲側目竟以資政殿學
士出知紹興後復歷知宣州潭洪諸郡卒年六
十九贈光祿大夫建康郡開國侯食邑千三百
戶食實封二百戶謚敏肅

吳彖勝字勝之永寧鄉茅城人幼聽其父講伊洛
書輒能懸解平生不妄言笑游庠序間儕輩嚴
憚之登淳熙八年進士丞相趙汝愚廉其才授

以嘉興教授浙西使者將薦用之會汝愚去御史湯碩劾柔勝嘗救荒浙右爲汝愚收人心又嘗黨朱熹之學不可爲士子率始柔勝舉諸生潘時舉呂喬年白子長輩講明朱子四書解伊洛之傳爲之一振故忌者中之自是屏廢十餘年嘉定間復錄用凡四遷至司農寺丞出知隨州時和議復成禁諸郡毋開邊隙犯者立誅之有梁臯者北人盜其馬臯追而與之鬪北人以爲言郡下七人于獄柔勝至立破械縱之以其狀遣報北人而已嘗收孟宗政扈再興隸帳下後二人者皆爲名將又招亡命者十人褒曰忠勇軍士氣復揚築隨州棗陽二城及補葺營壘甚備先是隨州經兵火榛莽墟也至是稍還舊觀隨人大悅除京西提刑領州如故改湖北運判兼知鄂州甫至歲大饑乃乞糴于湖廣遠近賴以全活者甚衆改知太平州最後除秘閣修撰主宮觀卒謚正肅

舊志黃汝金曰按史吳柔勝父子皆宣州人

溧水在宋未嘗隸宣州今寧國已列於鄉賢
溧水復收者誤也徽州又指淵潛爲休寧玉
堂巷人特以宣州籍登進士耳據此則溧水
愈遠矣今高淳亦祀于鄉溧水誤之也湖州
亦載柔勝以墓在誤之也徐獻忠掌故集及
他志槩稱溧水人未詳史耳然三賢祀于溧
者有年矣姑仍之但著此存疑云

吳淵字道父柔勝第三子也幼端重寡言苦志力
學五歲喪母哀慕如成人嘉定七年舉進士

建聽縣主簿丞相史彌遠竒之語竟日大悅謂

淵曰君國器也今開化新置尉姑宜以此處君
淵力辭而去及丁父憂詔以前職起復辭之弗

許乃貽書政府曰人道莫大於事親事親莫大
於送死苟冒哀求榮則平生大節掃地矣公家
尚安用之時丞相史嵩之方起復淵復上疏議
者難之淵弗顧詔竟從其乞後廷議欲用兵中
原以據關守河爲說時淵方進用乃力陳其不
可大要謂國家力決不能取縱取之決不能守

宰相鄭清之不樂罷出知江州無何果如淵議
清之致書引咎焉淵在位所至稱治辦計淵所
嘗賑濟全活者二百萬餘人又嘗有殲寇功後
詔褒淵善政凡二十五事遂拜資政殿大學士
封金陵侯進爵爲公無何爲御史劉元龍所劾
淵平時被劾或左遷或奪官者數矣至是帝始
寢其奏至寶祐五年復以軍功拜叅知政事越
七日卒贈少師賻銀絹以五百計議者謂淵有
材略又能興學養士宜克濟迺爾第以其政尚
嚴酷容有不滿者其弟潛亦數諫止之所著易
解及退庵文集奏議

吳潛字毅夫宣州人柔勝之季子嘉定十年登進
士第一授丞事郎簽鎮東軍節度判官紹定四
年累遷尚書右郎官會都城火潛上疏累百言
其言云願陛下引咎修省必使國人信之母徒
減膳徹樂而忽其大者若以並進君子小人爲
包荒兼容邪說止論爲皇極則致災之由端在
此矣惟陛下下一反之庶幾天意可回也又貽書

丞相史彌遠論時政凡六事歷少府少卿淮西
總領因白執政曰今金人旣滅南北爲隣但宜
堅守以養國威毋用兵內地自敝爲也自後興
師輒敗潛言率驗遷大府卿權沿江制置知建
康府江東安撫留守上疏論保蜀襄防江海進
取有甚難者三事端平元年詔求直言潛首陳
九事中忤時政罷奉祠改秘閣修撰尋太常少
卿奉造斛斗輸諸郡租寬恤人戶培植根本凡
十五事又言和戰成敗大計貽書執政論京西
旣失當招收京淮精兵以保江西時國漸削潛
復言曰望陛下念大業將傾士習已壞以靜專
察群情以剛明消衆慝毋以術數相高而以事
功相勉毋以陰謀相訐而以識見相先庶幾危
者尚可安而衰者尚可起也又請分路取士以
收淮襄人物上邊儲防禦等十五事及論防拓
江海團結措置等事又言艱屯蹇困之時非反
身修德無以求亨通之理乞遴選近族維係人
心以俟太子之生帝嘉納之潛有言輒進而言

顧弗行也後累遷僉書樞密院事進封金陵郡
侯以亢旱乞罷免召同知樞密院兼叅知政事
入對言國家之不能無敝猶人之不能無病今
日之病不但倉扁望之而驚庸醫亦望而驚矣
願陛下篤任元老博采衆益使臣輩得以效牛
溲馬渤之助以不辱陛下知人之明淳祐十一
年入爲叅知政事拜右丞相兼樞密使明年以
水災罷後以醴泉觀使兼侍讀召入對論畏天
命結民心進賢才通下情四事進左丞相封許
國公元兵渡江攻鄂州潛奏今鄂渚被兵湖南
擾動推原禍根良由近年姦臣儉士設爲虛議
迷國誤君其禍一二年而愈酷公道晦蝕名節
喪敗天怒人怨積爲宗社之憂將立度宗爲太
子潛密奏云臣無彌遠之材忠王無陛下之福
帝怒賈似道因令沈炎劾之遂落職謫建昌軍
尋徙潮州責授化州團練使循州安置潛預知
死日語人曰吾將逝矣夜必雷風大作已而果
然四鼓開霽撰遺表作詩頌端坐而逝天下寃

之德祐元年追復原官明年以太府卿柳岳請
贈謚特贈少師史稱潛忠亮剛直才長於奏對

凡三百餘疏載年譜中

初賈似道移黃州謂潛欲殺已故卿之深及潛

既逐似道猶屢中之至令劉宗申毒殺潛潛且死猶以死諫烈矣哉丁氏許以文天祥之亞不過也後似道為門下鄭虎臣殛死有趙介如弔以文曰嗚呼履齋死循死於宗申先生死聞死於虞臣吁盡之矣又有吳循州賈循州之語天下快之可見凜然霜鉞常在人間後世可不畏哉

明

趙本字居仁以字行鑑之孫生而穎悟長以學行

聞洪武間以薦辟起授通政使司右叅議外擢未幾復授通政司左通政以苦節自勵家無蓋藏其孫徃省之止給鈔二貫冷徒步歸聞者駭之永樂間出治水溯江居仁患之曰艱哉斯役也人成之而潮毀之徒使吾民死板築已耳以文請於海神潮果弗至者三日而功遂成吁猶有上世之餘烈耶

端孝文端孝思以善二子也明初同為史官善屬文季氏尤工書法初孝文使朝鮮朝鮮重其才

將厚爲壽問端太史行李何在孝文曰吾持一節來耳請雉以一節返無何孝思復使朝鮮孝文勉以詩中及冰蘖操之語孝思拜受而去後亦惟以一節還報兄朝鮮榮其事爲立雙清館表之云又聞朝鮮收孝思寸楮卽寶之曰此小史碎金也其見重如此

丁沂字宗魯由進士初任部署間名長者歷官副都御史正德間考天下清正第一今祀於鄉

武曷字元亮別號橙墩以字行幼有奇志長成偉人嗜好經史詩詞不營貨利雖席素封澹然自適惟以課子爲事性好山水交友歲以爲樂早年嘗以例授浙江臬司幕未赴終以子尚耕官贈福建僉憲加贈四川叅藩人皆以其生平好施行德食報不爽也江西泰和郭子章中丞爲之誌又叙其詩詩有攸好堂存稿若干卷行於世

武尚耕號潯川隆慶庚午舉於鄉辛未登張元怵榜進士授廣東程鄉縣知縣考選禮科給事中

歷遷湖廣左布政先任四川叅政值洞蠻之亂
奉詔征討以功上聞特陞蠻靖勲于峨嵋山
石時朝右僉重其才能膽略居官以清介自持
不受一錢及歸田仍守布素里人王希仁徃見
之三子在侍體無完衣者以是清名大著人歎
不可及先是公會夢潯川二字遂以爲號後仕
楚有餞飲于潯川閣者公訝而知其官之別止
云有詩稿若干卷繼其父曷攸好堂集行世
王名登號雲臺萬曆丁未進士授大名府元城縣

知縣居官有操守歷遷保定府知府愈加清白
卒于官今人猶惜之家無擔石儲惟教子有素
子若屏老而貧能以詩文繼其父公幼孤事寡
母如嚴父居官首重學校諸生中貧而有志者
嘗捐俸餽之所拔識士多至通顯斯歷非一官
元城有去思碑唐縣入名宦祠本縣崇祀鄉賢
嗚乎仕宦如名聲者可勿媿生平矣

人物傳

宋

王綸字德言號廷輔幼穎悟十歲能文登紹興五年進士累官同知樞密院事以資政殿大學士知建康府嘗建言孔門弟子及後世諸儒皆得從祀先聖後致仕卽居建康於府治西斗門橋南建畫錦堂優游其中無何卒年六十九謚章敏與妻嚴氏歸葬溧水峒峴山子四時誓時藝時傑時亨仍居溧水父修已母許氏合葬長壽

鄉朱湯村從孫源江州同知明進士王魯源七世孫也

元

趙鑑字叩之美丰標而蘊籍近人朋游指爲衛洗馬復出矣性好施里中饑者多賴之以儒進授學官不赴後被薦

明

姚敬重字克仁姚古七世孫也由儒士授本縣儒學訓導洪武初被薦赴京送翰林院考通五經

欽除附馬都尉府學錄兼翰林院五經博士治政章擢左贊善歷陞左副都御史擢太子賓客卒於京謚文林先生賜寶鈔一百錠營葬於贊賢鄉上庄里

談允以洪武庚午舉人仕至右副都御史在官執憲森嚴百僚竦懼凜若秋霜溧水產世居高淳今爲望族

蕭叔裕洪武間由辟召爲夔州府經歷素好詩書專尚大節在任受知于郡守因以吏事委之郡

瀕江風爲盜藪吏弗能戢叔裕策捕厥魁群黨
屏跡蜀初定夔屬要衝治匪易又奉郡檄綜理
屯田頗循舊治法守竒其材以政績上宜得顯
擢時太祖新持刑亂人咸惴惴遂謝病以歸孫
文舉以上舍異等爲翰林孔目與端木孝文同
宦爲請公傳世人儀之今溧稱著族云

魏資敬字覲之良臣之後洪武初以通經薦授棗
強丞有政譽秩歸入覲擢監察御史以骨鯁敢
言見稱後擢戍夔州晚歸故里卒資敬負才略
重名檢尤不惑于流俗云

姚文仲敬仲胞弟也由明經儒士洪武八年授王
府教授高皇后賜列女傳一部

王良字善之由人材仕至浙江按察使居官有苦
操嘗隱於壽國寺著詩稿存於家有詩云相看
不厭廬山色頭白歸來已忘機人因而窺其志
姚行字本達姚古九世孫也由儒士任戶科給事
中至永樂六年陞湖廣布政使司左叅政安邊
有功深蒙恩寵時人榮之

張彥聲永樂間舉於鄉歷官河南道御史清慎持
憲成祖賜金牌百面文曰赤金十分舉朝榮之
居邑南孔鎮是爲浚之次子杓之裔孫也姪紀
由歲貢知萬安亦有先世之風云

郭欽字宗堯盧龍籍成化十一年由進士授行人
尋擢御史卽抗疏劾閣官用事者上亦勿之譴
常使塞上有威名又上書論邊事甚悉頗見採
納出爲江西僉事復以望著然竟以故不容於
時尋謫淮安府貳後復見用歷四徙而至廷尉

攝大司寇事刑獄稱平尋引年致仕去嘗語客
曰生者寄耳因自賦輓詩寓意或謂云昔陶潛
作自祭文公真無愧其達答云余愧勿及陶者
挂冠晚耳聞者益多之年七十四而卒有鈍翁
集藏於家

袁濟號訥菴成化甲辰貢士授易州判歷七載兼
督捕俸入悉以造屋於曠野招民聚居以防盜
行旅賴之稱爲袁公店都憲高公嘉其事而察
其廉幹委以轉運任勞而卒于官永豐羅倫聞

其賢手繪一松題詩贈之信陽何景明賦詩哀
輓濟勿沒矣

范祺字應禎少穎敏慕學由進士歷官福建僉事
有操守於法無少貸豪右咸屏跡正德丁卯改
雲南僉事乃喟然曰吾視茫茫而髮蒼蒼尚縻
一官哉卽懇疏乞歸時逆瑾方柄用祺故不樂
仕又能以老自晦識者益高其義家居餘二十
年足跡不及公府年八十四而卒有拙齋集藏
於家

楊公翰字具臣號培庵一號漁石幼而穎異年十
七補博士弟子員試輒冠軍邑侯喻公言興尤
器重之三試俱置第一萬曆癸卯領鄉薦甲辰
捷南宮初任行人丁外艱服闋以資望擬授銓
曹爲嫉者所中改工部郎陞漳州府太守漳濱
海地俗獷健訟公以清靜爲理務與輯寧又議
開封山之禁以利公諸民海寇犯境公力爲捕
勦捷聞上命紀錄事載通紀其他善政不可枚
舉漳人愛而敬之兼父母神明之戴尸祝迄今

不衰居五載舉廉卓第一升分守湖東副憲歷
興泉道江西觀察使本省右轄轉河南左藩革
火耗捐公費汴人咸謂數百年來無如公廉介
者辛未入覲得召對力陳民間疾苦上嘉之時
廷議以青豫兩撫推公公託疾懇辭再疏迺獲
俞旨以調理赴任公旋里避跡湖山間不入城
市者十餘年後起為太僕卿復以老疾告休道
遙林壑卒年八十有六子寧吳恩貢未仕先公
卒孫四長曰靜戊子拔貢尤知名于時

施一鰲字士選生而穎異父近菴幼以聯句詩文

口授成誦十二歲應童子試京兆許公奇之十
五補弟子員以父母連喪丁艱哀毀廬墓時以
孝聞居臨衙後邑令喻公詰問哀者為誰即以
喪與其易也寧戚題面試稱賞時按君行部觀
風居首自是試輒高等連赴棘園十次曾纂修
萬曆泰昌天啟三朝實錄迨應崇禎恩貢選貴
池司訓以揭薦陞授沔陽州學正時楚蜀寇亂
楊閣部巡方委署州篆詰戎治賦有聲州有里

大坑廣四十余里內田一萬三千七百畝因襄
水衝破口岸幾三十年民苦無計抵塞時諭以
聚船百隻沉底隨拆破房百間排架聚土高築
費工三月堤成民多感戴鄉紳侍御金聲勒碑
紀績上臺疏薦補知安陸縣邑以賊破關箱搶
盜數十人陷入大辟力請當道盡釋其寃期年
托病告歸有勅予仁聲名行錄序稿載藝文誌
年八十四歲尚健赴賓筵九次三子可行用行
壯行俱庠士而可行以保舉賢良未仕

王可學字景聖號至吾篤于孝友有曾閔之行內
外交稱無間嘗爲善于鄉歲稔糶以療饑凶則
掩骼萬曆丙午歲貢授姑孰博探寒贄守冰操
士多以此敬事之後得別駕鄖陽寬猛互濟荏
苒不驚理奇寃多所平反歸休之日借寇擁轡
去思不泯至今與峴山比烈生平吟咏甚富所
著有覆瓿集及易原行世姑孰進士徐紹泰其
門下士也爲撰誌銘邑侯張錫命屠侍御有贊
辭焉

孫玕嘉靖間舉於鄉仕爲福建漳浦令在官廉辦
有聲人敬服之

武尚賓字邦嘉號鶴汀贈太僕丞暉之子也幼生
穎異博通經史于書無不讀且能旁及詩奕時
譽推許已知賓爲大有爲士也始太僕仕爲台
州幕以勲倭死賓甫弱冠及補庠生乃抱疏陳
情肅宗愍暉死節贈以前官蔭賓入監讀書賓
得舉于順天乃復請朝廷移蔭仲弟尚冕政府
李文定見而竒之曰得非前日抗疏生耶甚雅

見重于時類此也後仕爲建寧推官又以廉明
折獄平反決劉一貫涂觀洪之疑案民稱無冤
秩滿竟遷南康丞或謂賓必不自得賓聞而笑
曰丞何負我慷慨之官時中貴啣命出酷權爲
姦動以廢格詔書齟齬有司賓恐中其禍竟拂
衣歸卒年六十四有雕虫襍集行世吏部徐公
必達爲傳志銘

王守素字德履號帶河生而姿狀偉岸心胸洞達
使人敬畏登萬曆庚辰進士授抗州推官折獄

平反民靡弗服歷任光祿卿正直廉慎蓋守其
祖像父雋家法以名教相規人品自樹者也常
作白府君事略序載廟志

武化中字大冶性沉毅寬猛相濟萬曆巳酉領鄉
薦屢上公車不第仕爲黃陂令黃素稱難治民
視國課如私負勿就完納蒞此者輒以累官化
中下車一意解化不事敲撲得于會計無損秩
滿臺使者聞諸朝當得優擢熙宗曰爲令得民
心莫若久任始安其政蓋欲老其才而重用之

再三年公入覲銓部議以南臺爲之地有嫉者
中之以閒曹推章上熙宗覽而驚曰使此官予
此職臺省之地居何人遂得中旨卒如銓議比
命下卒已數日袁京郡計至黃黃民哀之如失
慈父母焉子令緒克承父志博極群書爲時名
雋

國朝順治十一年爲督學藍侍讀恩貢高拔天之報
化中者固不必於其身也

蕭仲芳字甫馨號月株生而頎偉不好弄父鳴禮

自幼以亢宗期之使就外傳胡思泉學試以對
曰卧冰知子孝應聲曰立雪見師尊時驚異焉
十九補弟子員爲文務法先正試輒高等父令
入太學曰兒畏崔烈兒咲人也天啟甲子秋試
弗售歸杜門學古以孝友自立兄瞽爲父所憂
仲芳事之使如文昌復明凡一切子姪婚嫁悉
力完不德色志在匡時居恒每奮發砥礪天忌
而奪其年里之人慟之如失梁棟焉子三秉訖
秉晉皆名諸生

趙之驊字孟良號是愚中天啓乙丑進士生有異
姿幼隨父讀經史過目成誦九歲出試邑卽以
其名屬對隨口曰趙爲百姓之首驊超萬馬之
群目爲奇童十三入庠序每試必冠軍初授鎮
江教諭擢德化縣多善政創尊經閣以興士築
堤閘以利民值三王之國道經江上公展應辦
之才勿累地方人咸德之故褒詔綸言有餐冰
著縈游刃解煩輪蹄輻輳供億匪飭于厨傳租
賦全登敲撲不行于撫字江瀕多再獲之田菑

苻無嘯聚之警可謂王言華衣士論攸歸者矣
後遷國子監博士終南儀部郎

王應祥號履旋自幼篤志喜讀秦漢以上書性孝
友平居慎言對人不露圭角邑令徐良彥重其
文課藝外公絕不干以他事嘗被盜劫尋捕獲
羣盜訊實伏罪繫獄數年皆垂斃公自之巡方
一旦解網釋去羣盜感其義盡復爲良民每逢
歲節至公家叩首稱謝公年近六旬尚孳孳好
學蹇於遇僅以明經任丹陽司訓未幾告歸後

齋葦出多蜚譽縉紳間壽八十有四學博吳世
濟扁其堂曰古之君子非虛諛也

王象坤號拙庵幼穎敏力學不倦孝親友弟待人
無少長一本於誠每訓子弟謂於己圖其利而
以害推於人者固非以君子之名自予而以不
肖之名加人此念亦爲刻薄不可不戒遇人困
阨必多方周卹施德不使人知負鴻才積學屢
蹶場屋無怨尤以恩貢授州佐未仕優游林泉
凡古今書籍無不覽究又喜爲人講說聽者如

源水縣志
坐春風中邑令慕其德屢延爲上賓年七十七卒遺訓語語金石邑人皆悲悼太息曰盛德長者不可復見矣著述悉藏於家子若孫皆謹厚多上進者有萬石君家風云

章世育號喬嶽少博學善文試輒高等學使者郡有司咸以大器期之以明經授寧國府司訓遷浙屬宣平教諭性廉潔不苟取郡守嘉其誼檄署松陽縣篆公以年暮遂力辭歸家居者垂三十年歷赴賓筵歲時與邑宰會公事外一語不及私雖庸人孺子望而皆指爲仁厚長者也壽九十三歲無疾而終前太學經邦經國其孫今廩庠呈運太學升庠生射斗燧斗皆其後裔也家族繁衍人以爲公之盛德所植云

王運啟字開之家貧篤學以順治壬辰廷試授全椒司訓續一明經旣絕之後完一士人欲棄之妻時巡方衛諱貞元稱其率士守城厥勞當獎將題疏遂乞休致居家行功過格誦感應篇如此三年而歿壽六十有六生三子長擢次擢

俱感泮

廉能傳

明

司徒化邦字光宇少負不羈之才事親孝撫諸弟
盡友于生于素封處如寒素絕無驕奢喜怒不
形詩書是好嘗有魯男子之事人皆賢之以庠
生入國學仕上高丞宅心清介上人重之擢遼
陽衛叅軍非其意以疾乞歸優游詩酒逸樂林

泉結客課孫自娛風景得年八十有四無
終

朱國鼎字調卿一字鉉伯幼淹經史長業蕭曹仕
爲河南溫縣尉不嫌下位履任四年力行百政
忘絕已私誓爲公急率兵勦賊革弊安民立義
塚置學田溫人繪圖歌頌勒石迄今思之崇禎
壬午年寧夏巡撫右僉都御史楊嗣修庚辰勦
遼監軍道張斗合溫紳士前後咸有詩文以紀
懋積君之賢能不媿時論云

馬繼檄字伯符幼誦于試自謂丈夫當有所為遂
棄鉛槧業蕭曹行事有體為邑令徐公必達所
器重仕山西太谷縣典史人不以尉尉之頌滿
民口擢趙王工正以親老歸養盡子職人以孝
稱教子六列黌宮者四俱端方有父風晚歲樂
詩酒享年八十有四終

溧水縣志卷之六終

溧水縣志卷之七

孝子傳

宋

伊小乙城中人剖腹取肝以療母疾乾道間聞于
朝旌其里曰表孝

夏某逸其名溧橋人事母至孝淳熙間旌其里曰
昭孝

劉興祖表孝坊民也剖股以療父疾愈而復作又
剖腹取肝襍糜進之嘉定間旌表

謝千九山陽鄉人割股療父疾

陳某逸其名思鶴鄉人咸淳間割股療母疾

嚴晃宋武進士幼以孝聞元兵渡江晃負母避與兵值兵刃其母晃以身蔽之刃中其頸終身不能仰視壽七十八而終

鄭雲龍割股療母疾

明

虞周天順間爲邑庠生母史氏患蠱諸醫不効

割股愈焉

梅洪少孤未嘗學所行槩有儒者風而尤以孝著洪自奉甚約母膳必以甘脆進其婦勿藥也洪出輒有後言洪覺之一日呼其婦數之曰新婦無禮於姑尚何論其它若亟出願從此絕矣親舊力爲解卒不聽自是洪獨與母居餘二十年不言娶奉母唯謹後其母瞽行必洪負之且泣曰天乎安得使吾母一見孤兒哉無何目忽一明人皆異其孝感云母九十五而卒洪悲號若嬰慕然廬墓終三歲還縣令聞其賢屢及門洪

輒避去令語其隣曰孝子薄令耶且吾欲成孝子孝耳孝子其有意乎洪聞之始與見令曰惜哉子未學也子志于孝而勿娶是不知有無後憂不知有無後憂是使子父母傳子而絕矣奚其孝于是洪大動令心知其貧爲娶婦內之無何生子矣而益貧婦亦勿樂也數求去洪嘆曰吾昔也子而婦今也父而母固命也復何言婦竟去後數歲其子卒洪亦隨卒邑人憐之收葬於城北十里許後有監司宋某者題之曰孝子梅洪之墓而人則呼爲梅孝子墓而不名近黃山人汝金爲之傳則又謂洪嘗有隣人兄弟爭產者洪願分已產以償所爭爭者服其義而解洪嘗倡新白侯廟諸富人爭餉之洪日以半升水糲自隨諸富人不敢復言餉議者又服其介里中兒有目攝其母者洪惟罪已不已其人大慚洪之能下人又如此又聞洪兩遣婦皆處以禮焉嗚呼洪果不學而身備諸善乎哉然而可以名洪者則無如孝云

丁滌成化間爲諸生事母孝母死廬墓側時王令
弼稱長者甚悉滌哀毀狀迺過慰之與之語若
將厭厭從地下者令爲嗟嘆不已令凡三過滌
卒無異曩所見令去滌亦無所報謝令益高之
將聞其事於朝滌遜謝曰使君意良厚獨柰何
使滌以大不幸者就旦夕名滌且媿死矣令亦
驚謝曰吾欲以旦夕名重輕子曩實非知子者
後歲餘滌爲貲郎入都王令時在比部因撰丁
孝子廬墓記贈之雅非滌意也

周什一弘治間仙壇鄉一圖荷塘村人也少孤貧
父用四早卒事母朱氏至孝負販以養一日母
病思魚時值大風漁人罷釣什一走湖濱適覓
得一鮎倍價購歸剖之得黃金百兩後以是起
家今子孫代遊庠序人以爲孝子之報

翟鳳鳴山陽鄉人爲諸生父卒於姚州吏目土官
攘其妾因匿其柩鳳鳴往迎之徒步悲號白其
寃於上始迎柩還

傅哀贊賢鄉人歲貢不樂仕母死廬墓以孝聞常

應傳令應禎聘而出聞者曰傳生旣傲屣乎世而又爲傳令屈則傳令賢可知矣

虞欽居北隅割股療母病知縣傅應禎旌獎之黃棖居南隅割股療父病知縣傅應禎旌獎之

周家慶字永善仙壇鄉荷塘人父尚禮邑庠士早卒事母沈氏以孝聞母嘗病篤百藥不瘳慶衣不解帶水不入口徹夜祈斗願以身代恍惚夢有人騎白象而來曰爾心可嘉增母壽一紀又夢一女人以盞水喫母面又喫慶面曰令汝母

子全壽覺而母忽清涼沉疴立起慶自忖曰夢乘象者必五臺山文殊佛也誓往謁謝冒險至山時有夜臺禪師名重朝野每夜必週遊五臺一見慶至摩頂受記曰汝一點孩心來得清淨子母俱全同人數百一無所語慶又忖曰以水沃面者或南海觀音耶卽乘筏渡南海黑夜至捨身岩跪祝海神曰慶遠歷山海者爲祈母壽耳願見海燈兆母壽數跪至丙夜果見波濤上燈大如月者七慶又叩曰豈母壽止七表耶願

求其餘後又見燈小如星者九因拜謝之後母果七十九齡無疾而終於是慶日寃佛道變化之繇其後慶亦七十九齡無疾而終正應夢中母子全壽之數前後邑大夫聞而異之俱旌其孝云

趙鳴臯字聞野幼喪父母事繼母至孝卽累見擯斤而孝勿衰母亦反爲所化貧而力學試屢不遇遂篤志教子之驍成名進士子貴封文林郎生平樂施尚義德邵年高舉鄉實者再壽八十一有七所著有江州漫興樂善齋漫吟趙公小言諸集行于世

袁文化白鹿鄉人父死廬墓九載三十喪妻終身不再娶足不履公庭未識官長百鄉人重其孝義相率銘其墓有云三十鰥居敦大義九年廬墓重天彝

蕭泮年十九父賓外賈久不歸號泣辭母涉江淮歷泮冀踪跡不得數年而後返致疾終其身事母陳盡孝邑人陳鳳舜有劉殷痛哭天地寒孝

感芹生德相侶之詩閣部吳姓爲之傳

楊振新邑庠生父死廬墓知縣張錫命旌獎之

章憲文南昌府通判甫詔之子也幼穎秀能文性

正直爲庠士所推重穉年喪母事繼母曹至孝

曹不以子子之百計爲害憲文甘受不出片語

父病禱天祈保全盡子道不形于事跡孝至純

徐學忠以純孝稱於鄉里天啟間奉旨旌賜粟帛

任超篤于行孝父病危超籲天剖股密調劑而父

愈年八十餘垂老始得聞之天欲彰隱德也

國朝

湯學紳白鹿鄉人三歲失母撫於繼母劉患癰疽

吮之繼以嘗糞劉視紳若離裏而紳報劉若乳

哺劉進又事鄭如之爰死廬墓盡哀順治十一

年有司上聞建坊表其閭

黃門言父病割股以療舉鄉飲介賓其子世紀復

效之母疾亦瘳邑令閔泐魯學諭吳鼎玫給扁

旌獎一日孝萃一門一日父子克孝後縣令馮

泰運李作楫俱旌獎之

張鏞幼篤於孝行母王氏病歷幾不起鏞割股和藥進之而母愈已而母病復作鏞復割股取肝爲寸許者二投盂中遂昏仆地閱三日忽見一老僧握手謂之曰汝母當無恙汝今事已畢可以行矣言訖不見又一日而卒時年二十一縣令馮泰運旌獎之後縣令李作楫爲之作篆題其墓曰孝子張鏞之墓

錢文象豐慶鄉人素有孝行父母匹廬墓三載見其墓曰孝子張鏞之墓

孫以孝爲先鄉黨中稱爲長者知縣饒應元獎張問道幼年克孝母病割股和藥以進尋愈

任師琦年方總角母疾篤割股和藥以進母尋愈後十五年方卒老年事父猶若嬰兒族黨間稱曰孝子知縣楊國楨獎之

謝胤綱自幼克孝勤苦以供甘旨母病割股和藥進之遂復甦後廿三年壽終人以爲孝感焉知縣王鼎胤嘉獎曰孝懿誠篤

貞烈傳

余氏杏林市人少寡里中惡少慕其色脇以刃余
不從而死事聞於朝改市曰節婦里今屬高淳
夏氏涑橋夏家女年十三母病篤割脇割肝和藥
以進母遂愈淳熙間表其里曰昭孝

李氏割股療母疾

謝氏割股療母疾

趙氏李震龍妻祖母朱氏病割股以療知縣周成
之爲之申獎

元

三烈婦衡氏趙雷澤妻

劉氏趙楷妻

夏氏

棟妻時汝穎兵起攻建業城陷三氏相向誓無
何同赴水死時號三烈翰林學士陳祖仁有傳
潞國公張翥有贊

薩法禮寡而甚貧勤織紡訓子至治二年旌其門
曰貞節至順間以子貴封容國夫人

花山婦失其姓氏至元丙子值亂兵被執不得死
至崇賢鄉碑亭橋腦指瀝血題詩於橋赴水死
其詩曰君王有難妾當災棄子離夫被擄來遙

望花山河處是存亾兩地亦哀哉

尤氏苗子英年少夫死嚙指自誓終不貳有司
以聞旌其門

黃氏張和妻年未三十而寡卽截髮自明日吾未
可死者以孤在耳卒能撫孤完節終焉至正間
旌表之

陳氏汪氏王容之一妻一妾也夫亾俱善養舅姑
至正間淮兵亂迫之弗從並餓而死事聞於朝
表貞烈其子良顯

袁氏年一十五歲事母嚴氏至孝母病癰火延其
廬隣婦呼之曰勢不能俱生矣女也盍去之女
泣謝曰使我生而無母不如無生遂抱母死火
中

明

陳氏王仕妻夫死守節辛苦存孤

俞氏茂才甘如桂妻如桂死俞尚少或謂姑老子
幼奈何俞泣曰此未亾人責也卒能勤苦完其
志萬曆間監司獎其廬博士丁永曉爲之序

任氏黃志遠妻少而寡誓存遺腹年八十終歐陽
撫臺獎之

俞氏宋狀元俞棗五世孫女也居贊賢鄉父俞旭
母陳氏生子七人女行三幼字庠生周輅將適
輅歿氏立志不貳父母亦不能強撥田八畝與
氏守貞勤苦紡織積金數十捨造神山庵橋將
終以所撥田亦捨在庵以延香火享年八十餘
卒葬父母側亾不數日各村祭祀有神附人言
曰俞氏爲閃電娘娘爾各村宜俱祀焉女故成
化丁亥十月有墓碑

劉氏贈承德郎主事王崇妻生子數月卽喪夫撫
孤名登成進士具疏陳情萬曆間勅贈安人謂
其青年砥節白首流慈厥天無年而有年厥子
無父而有父延宗脉勤課訓刻刻皆辛苦字字
皆血淚云

王氏舉人武尚訓繼妻年十七夫故氏誓死屢自
經以姑陳氏救之守節四十四年百苦備嘗撫
子成名萬曆三十六年奉旨旌表貞節

楊氏丁可輔妻年二十六 徐氏丁可弼妻年二
十二輔弼俱亾二氏誓相同守皆無子五十餘
年冰操堅貞足稱雙節

楊氏彭澤令許根善繼室年十六歸許生子甫週
夫卽歿于官截髮自矢紡織教子持冰霜操四
十餘年督學陳給米帛直指屢旌其廬

張氏邑廩生許點妻年二十生二女點死立志守
節有丁姓者陰爲謀娶氏剔目自誓丁懼而止
蓬首垢衣不窺閫外者四十九年屢受旌獎焉

管氏經國猷妻歸經歲餘夫死有遺腹自計生男
當撫孤卽女死未爲晚及生女也遂繼死萬曆
間表其門曰貞烈

張氏毛邦久妻歸三載夫卒年二十一子之麒甫
二齡家酷貧事舅姑以孝處伯叔以禮凡舉九
喪皆出一未亾人之手嚴于教子每夜一燈相
對辟蠶課讀慈母若嚴師焉苦節四十四年宗
黨無間言有司屢獎其廬知縣游應龍司李董
梅巡按賀登選督學陳良弼題請旌表值國

變寢太守陳瑄大學士吳姓俱有詩贊載藝文
薛氏年十六適太學徐思毅甫生一子夫卒誓守
節有窺其色強之者氏懼迫促適剪在傍舉刺
強者卽自刺仆地節大彰撫按旌其門曰操貞
矢栢子可登貢入國學

王氏王涵女年十八歲適陳文心爲繼室二十一
歲守節撫孤四十七年知縣李可壇給扁旌獎
貞操裕後順治五年貢生陳雲犀其子也

俞氏庠生徐時亨妻年十七歸徐一年遺腹三月

而夫凶悍翁戾伯逼之改醮氏投水懸梁誓死
不易惟子秉完是視家貧極氏孤燈紡績課子
娶媳得孫遶膝享年八十知縣鄭洪照旌云松
栢堅貞族紳徐文煒有聯贈云十七歲居孀彩
袖喜添萱草色六十年苦節清冰儼睹栢舟心
周氏嚴國輔妻年十九夫死有遺腹甫數月卽矢
死不二及生男辛勤撫立事姑以孝聞貞節永
年見其曾孫知縣張錫命旌其廬

端氏丁櫛妻年二十三夫死子在襁褓立志撫孤

馮子煒歷仕貞操六十餘載直指屢旌獎之

謝氏顏守翰妻年二十二夫死撫子子死撫孫孫死撫曾孫苦節六十年崇禎間表其門曰貞節媳李氏孫媳蔣氏皆青年守節

張氏芮元化妻年十九生子方一目夫死守節撫孤翁病割股姑病又割股知縣張錫命旌獎之端烈婦逸其氏嫁月餘夫外賈紡織養翁姑八年無間夫病瀕歸令婦他適婦具酒食獻翁姑曰今當去願以爲別舉家信之夜遂投水死視其尸衣皆密縫嗚呼斷臂截耳光耀史冊以此較之又何如耶

吳氏章時獻妻年二十餘夫死矢志撫孤教二子爲邑庠生守節五十四年直指屢旌其廬

陶氏魏樞妻年二十五夫死子幼守節六十三年知縣朱身修旌獎之

丁氏省祭陳雲鵬妻未字刺股愈母旣適剖肱救夫年二十五守節撫子勤苦機杼以佐其讀萬曆四十三年撫按旌其閭曰節孝兩全子道上

亦蚤亾媳丁氏年二十以遺腹守節竭力事姑鄉閭以孝稱

傅氏庠士茆康宇妻胡氏庠士茆康年妻陳氏茆康衢妻妾尹氏俱年二十餘相率苦節世所罕有幸各有子庠生吉旋傳出吉常吉相成秉母訓能自樹立貞潔之氣萃于一門足風閭閻者也

趙氏王懋柯妻年二十七柯亾家貧苦節紡織撫孤萬曆間知縣董懋中旌其閭曰貞節邑進士王名登有詩載藝文

朱氏邑庠生嘉試女幼受陳彥璽聘及笄陳溺死哭請于母求往弔其父弗許後有徐姓齋欲娶禽女聞之以筆書几上曰願葬陳墓側卽縊死陳族數百人迎柩歸與彥璽合葬史塘凹先氏有祖姑未嫁守節五十歲卒

俞氏邵道昇妻年二十二歲而寡教子邵從龍入泮壽八十六歲而終

國朝

汪氏邵紹盛妻子生數月夫死家貧全節教子四十餘年縣府藩皆旌之

章氏王若驥妻年二十餘夫死守節五十三年署縣事程萬里旌獎之

陳氏邑庠生錢化龍妻乙酉歲亂兵入其家欲犯之婦憤然赴水死

周氏俞熊妻順治二年亂兵經其鄉挾之馬上氏誓不受污伺過橋奮躍入水死時有婢從亦同死

朱氏王仲舉妻年二十六夫歿毀容守節茹素布機杼不輟凡四十一年卒能教子揚名中順治辛卯武闈鄉試

汪氏汪紹祖女幼能孝歲乙酉年已及笄亂兵掠至其村婦皆驚竄女嘆曰事勢如此逃恐不免卽投湖死鄉人私謚曰孝烈

許氏蒲村武氏之甥女年十六未字人隨父庠生許夢明避亂於外家值搜山兵至挾之馬上氏給之曰我有金鐲諸飾在敗屋壁中願取以相

從兵利其有牽馬縱往勒轡在門候久不出入
視之則女已投屋後塘中死矣兵怒斫其屋而
去

程氏石湫壩流寓程天民女適邑庠孫 聞兵

至竄入村舍兵追得之以索繫行近河斫躍入
水溺不出兵恨以鎗戳其腹斷索而去次早孫
尋至收殮焉

陳氏女烏山人父爲西寧侯庄戶女年十五已字
人未適兵過其家欲殺其父索金女死之

兵舍父挾之去行經一村遙見一井詐言口渴
兵亦渴欲得水飲入村屋取汲具女投井死兵
出失女所在追屋後遍覓不得始汲水則女屍
與汲桶觸兵知已死碎桶而去村人出見井有
碎桶視井得女不知爲何許人女父尋至乃知
井主卽夫家泣曰女已于歸矣痛哉奇也

武艾蒲村庠生武可偁之長女年十六侍父母能
孝工織紉女紅暇則讀女論語旁及琵琶記諸
書古詩木蘭詞母曰女學宜習琵琶劇也烏用

此爲艾日記中趙五娘之婦道不足法耶母領而聽之武爲詩禮望族女子多習訓教者而艾尤慧善歲乙酉蔓兵至村艾被執妹橘亦在劫年甫十二罵兵受刃傷項臂赴水人救得甦艾巧伺一隙以膝帶自縊氣絕墮地跌坐微有笑容兵去人咸訝之倘亦死得其所乃含笑入地耶先是聞變卽自知不免夜夢庭中青烟起處恍有神助書劍旦告家人皆以爲妄越月果值此死豈非數與

馬氏贊賢鄉庠生朱國卿母也年二十四夫亾國卿方在襁褓氏誓守教子弱冠遊庠嘗卜居金壇壇紳王有三周簡臣重其節各有詩以贊之

王氏司徒國章妻也適二年夫亾誓死靡他人莫奪其志以織紝奉舅姑養撫幼孤亦賴十指五十餘年如一日能終舅姑喪葬不損夫遺田宅保家完節是才而賢者也年七十有一猶強健天實相之人以爲節孝之報云

李氏白鹿鄉農人張應鼎妻年十八適兩月而夫
死有遺腹苦節三十餘年撫子成人歷盡艱楚
且養姑尤盡孝焉

朱氏上原鄉民湯仁彙之妻年二十喪夫欲以身
殉絕食姑知其有遺腹亟勸慰之後生男朱卽
剪髮跣足不復修婦容家無斗筲紡織自給課
子讀書幾于有成而子忽死伶仃迨六旬苦節
四十年內外鄉黨悉稱之知縣閔泠魯給扁旌
之

翟氏思鶴鄉陸思璣妻年二十一喪夫子未及週
撫孤守志事舅姑至孝值歲歉或勸以他適因
瀝血自矢終不二天冰操四十年而卒子萬程
幼年克孝苦節之報也縣令劉登科旌獎之

袁氏周天奇妻守節五十餘年知縣安應晬獎之
靳氏李模妻年二十夫亡守節撫孤壽七十二歲
終子茂春任燕山左衛經歷考滿封母太孺人

袁氏白鹿鄉敦淑之女周尚貞妻少寡辛苦存孤
前膺嘉獎五次縣令劉登科復旌其閭子啓鼎

年二十六妻卒誓不再娶縣令李作楫獎之

王氏故守備葛之文妻年廿四喪夫守節存孤

湯氏謝胤綬妻二十二歲夫病割股進之遂愈後

三年夫復病再割股夫歿守節

周氏陳良弼妻廿二歲守節撫孤年逾六旬知縣

李作楫旌獎之

曹氏庠生周初暘妻廿五歲守節前縣令獎之

孫氏夏之益妻廿四歲守節中武鄉試夏霖其子

也

湯氏謝胤銓妻二十七歲守節家無儲粟誓死存

孤事舅姑克盡婦道姑壽八十餘湯亦年逾六

旬左右奉養一如初嫁時居家刻苦勤儉教子

有方宗族稱爲孝婦復稱爲賢母府經歷署縣

事龔龍見旌其廬曰苦節可風

施氏陳時才妻苦節三十五年知縣閔派魯以通

庠公舉覈申 學憲其畧云節婦施氏于歸一

載卽失所天茹苦多年又傷無後勤織養高堂

之老毀容翻歷代之書所當亟 賜旌表風勵

末俗者也其見重於縣令如此

梅氏城西許一唯妻年廿四守志撫孤八十五歲而卒署縣令程萬里以節儉雙美獎之媳鄭氏昌佐妻廿五歲守節撫孤事姑孝年已七旬矣經氏俞嘉景妻二十六歲孀居長子衷恒次子衷直俱業儒入泮

孫氏王弘恒妻廿五歲守節存孤教子玉臣入泮陳氏王弘治妻生子三月夫亡堅守冰操四十餘年邑廩生臣曰其子也

李氏蕭士綸之妻年二十二子生數月而寡備嘗艱辛苦節撫孤知縣饒應元扁額旌表之

陳氏白鹿鄉袁國柱之妻年十八夫死矢志撫孤備嘗辛苦工織紉女工暇則教子慈母猶如嚴父縣令朱英旌獎之苦節永貞

謝氏蕭必壽之妻年二十子生甫八月即喪夫善事舅姑矢志撫孤知縣閔派魯縣令李作楫俱扁額旌表之

湯氏儀鳳鄉諸純仁妻年廿一歲夫亡守節事姑

以孝教子以慈縣令李作楫以苦節凌孀獎之
有子啟駒復克盡孝是亦守節之報也

丁氏在城鄉廿月鄉妻年十八歸其閨一歲爲未
亡人有遺腹立志守貞父母欲奪其志泣謂曰
吾嘗聞忠臣不事二君烈女不嫁二夫吾志決
矣幸父母無復他說後遺腹果生男勤紡績訓
子成家知縣李作楫旌其廬博士程之望贈詩
以贊閭邑咸欽仰焉

陳氏生員湯運新之母夫之俊早喪家貧誓死不
再醮和熊勵子辛勤歷五十年歲七十矣旣壽
且康人以爲苦節之報云

義士傳

元

湯大有五世同居子孫殆百口無一自私者大德
間表其門

明

楊寵思鶴鄉人時元末群盜起寵散家養敢死士

障一鄉云及明太祖渡江首命大將軍徐達取
溧水衆請戰寵則曰不可今有行仁義而起者
聖人也我則願爲聖人氓衆皆壯其言請於官
以全城降

吳釗山陽鄉人元末隱於市肆及大將軍兵至楊
寵者旣議降釗卽持牛酒爲諸父老先大將軍
上其名爵以萬戶釗遁去與寵皆莫知所終

俱出舊志并
趙氏野史

任義家城中正統間歲大饑義出穀三千石賑之
上表爲義民復其家

趙琪贊賢鄉人弱冠喪父撫二弟同居至白首弘
治間嘗兩建蒲塘橋費且數千餘金監司歷旌
之有記見橋下

張整孔鎮人正德三年大饑出穀千石以賑里人
有司聞于上詔給官帶稱之曰義宰

武鍾山陽鄉人性淳朴有太古風垂白不識縣庭
嘉靖二年旱鍾出穀二千餘石賑之又建三清
堰望湖山二橋

陳諱字睿之世居白鹿鄉弱冠時嘗讓產為兄弟
 謀後竟饒於貲嘉靖乙酉丙戌間邑大饑出糶
 萬餘石賑之時李中丞褒異焉後常助修學宮
 城郭置學田廣醫學及它義舉不勝載陳令光
 華嘗為傳其言曰孰有積而散如陳處士者哉
 武滄鍾子常建通津橋又修天生橋有記見橋下
 香山觀中栢宋時物也滄恐為俗夫所廢買存
 之嘗欲置義田實志而沒後其子曰曙曰易曰
 煦者出腴田三百畝為崇正書院義田以招西
 方同志者上司欲獎其義辭曰此父志也因以
 承先篤義四字扁其廬蓋推本於滄云煦子尚
 敏孝友聞于鄉與兄尚飭等析箸讓田千畝人
 咸義之可謂克世先德者矣

吳澍家城中嘉靖三年歲大饑死者相枕藉澍乃
 荷鋪行一時露而瘞者無慮數千時吳中丞聞
 而優異焉

湯詵有幹濟才慨慷好義奮不顧私每有公憤挺
 身論列時上元江寧句容溧陽高淳溧水六縣

分養官馬并揚二郡寄養官馬共計四千一百五十匹爲累不堪詵于隆慶戊辰年自責疏叩闕極陳其害遂奉旨革除六邑咸受其利他如邑民卞蘭等以二千九百畝之熟田假捏拋荒加糧槩縣又高淳韓邦憲等飛糧八千五百石加于溧水又皆說獨發其奸而除一邑之害者也府縣義之授以冠帶終身

劉濟歸政鄉人獨修長樂橋

袁愉富而好義嘉靖三十七年捐基造城縣尹曾震申文優恤之

陳文心龔廷機楊鑑皆溧之義士也萬曆十六年大荒三人共出穀千石以賑饑民民賴以生事聞有司請以冠帶優恤復其家

湯鳳岡白鹿鄉民萬曆十六年時大荒出粟捐資以賑饑民民賴以生者數千人天啓元年知縣張錫命聞其義舉飲于鄉五年又舉賓者二崇禎十四年大旱賑饑如前按臺遲大成給扁以風好義

陳灌號樂愚子景福孫文懋三世尚義事有人所難爲者咸易爲之凡諸務歷歷見碑陰者勿殫述如嘉靖戊午邑造石城灌捐金三百任造西城樓櫓萬曆丙戌徽恩閣圯景福捐資以成至修文廟建塔寺文懋則視爲家事繼祖父之義咸爲力任義行三世實所罕聞文懋嘗以資援府從事復不樂仕于邑里有善事莫弗資助人皆義之邑人武光宸趙鳴臯孫謀爲贊詞雖數舉介實非其意也其子雲鯉爲桂縣尉有父風

賢婦傳

謝文運

丁啟聖妻曹氏者性溫淑事舅姑謹遇娣姒睦勤於績緝女紅不以家饒益稍輟舉二子一女二子俱歿氏私買妾伺夫外賈歸進之夫啟聖拒之至再氏責以宗祊大計夫感寤納之逾年生一子氏取以自育愛之同於所生迄今丁祀賴以延者氏之功爲不可泯余嘗遠覽載籍如王琰妻之哭封劉孝標之三同二異率遭妬婦遂斬厥嗣悲夫又見時俗士夫之家及里閭之婦

或蛾眉工嫉或晨牝專房坐視其夫家索祀殄
曾不少惜今古一轍可勝痛哉余故舉氏以風
世撮其畧而爲之傳

人尤賢之

吳應舉正肅公後樂善好施邑有興建卽捐助千
金弗惜也至寺廟橋梁修造者不可悉述屢舉
賓飲

張曉熊子成邑之有幹畧者也溧水舉改折漕糧
之議二人挺身走京師詣闕請疏爲一邑利邑
之人莫不壯其行至今運米如舊邑里苦之恒
以二人爲思而嘆其不可復得也

王可舉字景伊太學生敦繕人倫襟懷夷澹家故

素封而尤樂善好施鄉人緩急是倚訖今謂有古騷人俠士風焉翰林學士顧起元爲之傳

謝揆崇賢鄉人五世同居屢舉鄉賓年九十七知

縣張錫命旌曰齒德兼隆

李應科號少塘太學生慷慨好義人以緩急靡弗

應卽多折閱不以介意輒焚其券士多義之子蔚幼有異才每試輒冠多士

國朝順治乙酉舉于鄉丁亥成進士人以爲科之德

報云

王應禎思鶴鄉人性謹厚不好名譽由邑掾歷事

居庸關當受職以親老告歸篤于孝友教子弟

以義方天啓間大水出穀賑饑全活甚衆濟人

困急隱而不言卒後見其遺像多拜者子象坤

以恩貢選州同次孫芝藻中甲午鄉試

陳應科少有大志爲人慷慨好義孝弟力田貧者

恤以財饑給以粟衆咸賴之一旦歎曰吾聞稼

穡之後子孫必昌令科終于農而不教子孫以

詩書焉望後人之通顯乎遂卜居金陵以貿易

起家訓子俊入泮尋復棄文就武乃至都闈
國朝順治甲午榜陳宿是其孫也

蕭濟性好義見沙河無梁慨然獨造撫軍設冬生
院養無告者捐穀百石助之建浮屠修寺廟咸
秉縣命捐財鳩工如治家焉至周貧恤孤莫不
遍及誠義士也鄉進士徐文煒爲之傳

王儔年十六娶妻芮甫生男顯恭芮卒儔感其孝
事二人誓不再娶至六十年不二色儔固本性
澹慾而能天倫不失人莫能以鸞弦強續亦可
謂義夫足風世矣

陳澗生平好義一夜觀市劇地拾遺金八兩餘待
劇散不歸以候失金者張敬元泣尋至澗詢其
金數包裹相合出還去市人嘆稱之年七十有
三無病臨終取平生貸券呼兒孫焚之曰吾畱
此倘汝曹持索不得必遺訟端勿若畱德與汝
勝遺金也時論義之

蕭渡號槐溪尚義輕財敬信神明見通邑廟祀獨
缺壽亭侯曷昭忠義廼偕兄濟漂出鏹特地建

造城隍泮宮石坊靡弗一一置力任成邑里姻
學博施一鰲爲之傳載蕭氏家譜云

端彬字惟均嶢山世旅也母夢月入懷而娠生性
英敏勤學孝友未二十游膠庠四十不售卽棄
去一意博古萬曆戊申大水倡義賑濟置田八
十畝資族子誦讀婚喪莫弗捐助年八十二狀
元朱之蕃爲撰誌銘

陳廷瑄溧水柘塘之義民也身長八尺有舉鼎之
力人以勇士偉丈夫日之家頗饒屢賑饑且有

素行可傳通州包壯行爲之傳載藝文

孫燦家富好施萬曆三十七年大水圩民饑困燦
捐資賑之金沙蔣超有傳見藝文

國朝

馬自驥義人也父繼桂年二十餘喪妻不復娶性
樂施驥承父志凡寺廟橋梁傾圮咸捐資財脩
建且躬任督工歲饑食人以粥活貧家父嘗言
股以起上聞督學侍讀藍澗旋共四州建造諸
事名勒碑陰人共賢之長洲周之標爲作父子

合傳載藝文

謝燦號明宇性孝友仁恕謙恭能容幼習儒誦於
試遂業蕭曹邑尹重之凡興革必諮其畫邑人
陰倉其福而不知焉歲滿當授尉因違初志不
就篤意教子首以聖賢之義理爲急不專令其
攻制舉習帖括也居家循禮春秋時饗饋莫必
忘自奉儉約處鄉黨雖接卑幼亦抑抑自下里
中待以舉火者其家邑有捕蛙蠟爲生者各予
之金令易業曰毋以戕生命爲活計也凡興建

敗於吳越法當誅顧縱之熙載力請誅覺竟以
此忤旨被逐後景以其弟齊王景達出禦周師
仍以陳覺爲監軍熙載復諫止之曰親王而將
安用監軍爲哉不聽而兵果以陳覺敗初熙載
奔吳時其友李穀憐而追送之熙載大醉訣曰
使江左相吾必長驅中原穀曰我爲相亦視江
左爲几上肉矣至是周師獲勝穀果爲將而熙
載惟怏怏已爾後復事李煜煜工文詞所進用
多才人首拜熙載中書侍郎勤政殿學士爵其

二子甚渥也其時國日蹙熙載知必亾廼盡寓其縱橫塊壘於聲酒間賓客從遊者日衆宴必侍數十姬煜使人覷而圖之以爲豪其所侍姬多私於賓客人皆汚其行有以千金雙環乞墓文者熙載不妄諛一詞乞者意未已熙載力却之聞者不識熙載何如人也煜幾欲相熙載終疑其汙未決尋左遷熙載廼盡逐諸賓客侍姬煜喜復其官不日且相之熙載諸賓客侍姬復進而宴如故煜詫曰吾亦不識熙載何如人也

如黷序公解廟寺橋道捐橐佐之功成而不居其名至所貸有不能償輒焚券不索聞富人督重息竊歎曰盍若少寬之爲子孫計其取償不更厚歟歲丙戌邑尹延致賓筵年六十三而卒卒三十餘載邑人猶思其德不泯丁未次子文運捷南宮報至一邑喜躍咸謂善人之報云李仲勳仙壇鄉人世爲邑芝山巨族生平樂善好施所居界溧水溧陽高淳間遇有凶歉行糜捐穀分賑三邑不矜其德曾爲禮部儒士例得授

職乃謝去與妻宋氏偕隱惟以義方教子之芬
之白姪之節俱入泮有聲康熙元年九月無疾
而逝至次年正月卽顯靈於溧陽之七里山彼
中居民同時夢一神語之曰我芝山李仲敷也
今爲本山都土地可立祠祀我因共相驚異爲
釀金建祠至今崇祀弗替云

隱逸傳

宋

趙休漢太傅之玄孫宣和中以才名屢聘不起自

陽來隱句曲尋買田溧水之南置別墅焉人

呼曰趙莊自是趙姓家於溧水後甚著

趙三捷字公武林之子少好學弗仕有父風神宇
磊落不群著族譜自漢及宋二千餘年歷歷若
視諸掌觀者咸才之又作論後文十篇諄諄長
者言也季子震字廷發由進士官國史編修女
卽魏良臣配也

趙煥字仲章以該洽聞授儒學教諭父卒葬西亭
山廬於墓終身不復仕四方學者多宗之尊爲

亭山先生有文集不傳生于宋卒于元年八十
五

姚鏞姚古次孫也以祖父勤王復地功除贛州太
守一日命工繪已像爲騎牛澗谷圖趙東野題
曰騎牛無笠又無簑斷壠橫崗到處過暖日晴
風不常有前村雨暗却如何公意欲隱而東野
實窺之也後果被一帥所劾其隱志益堅人
東野之言

朱木生而異相有隱德天授可法治人目如神
針甫下銀海旋光世盡稱之至十五世孫鼎于
明嘉靖六年欽召上用立効朝廷錫賚甚重

元

袁良所名當時以字行至正丁酉舉于鄉其先丹
陽人宋東陽太守宏御史孚節度霖皆其祖也
良所避紅巾亂卜居溧水家焉遇茅山異人授
以方書遂遁跡懸壺遨遊山水明方正學端木
孝友咸器重之嘗欲援引竟不可得公益堅于
隱矣所著有秋堂賦諸詩藏于家子璧任明太

略判孫縉遊膠庠翰林劉三吾有詩贈之見藝
文志

明

夏鑑字文明濂子也少有氣節嘗抵掌談天下事
謂易理耳第弗能就時格竟弗仕掃一室貯先
人所遺書而兀然其中曰足老我矣家故貧至
是益貧性孤潔無所合人跡罕有及其門者久
之里中諸鉅族習其名爭延致之而鑑弗許也
年七十受徒於鄉門下彬彬多賢者或語之云
子勿顯門下必有顯者出鑑大笑曰爾欲以北
面太守榮鄭玄乎後有司累辟不就壽七十五
而終所著有漁樂集諸弟子遂號爲漁樂先生
又嘗私撰溧水志藏於家兼好詩宗長慶體楷
書肖歐陽詢皆不汲汲於傳也

徐數字希文號恒齋崇賢鄉人幼失父母哀毀如
成人學無師授以里人忽之徙居城南性廉潔
業岐黃兼以活衆暇卽賦詩爲樂不希名譽有
猶子鬻宅購者必欲其押券拒不往強之乃自

携蔬酒不沾主人匕箸默然歸時雪盈尺猶子
持數金以壽君擊之擲金雪中曰吾縱貧忍見
子姓棄產且污我以牙儉里人聞而嘆曰徐君
真隱賢而義士也有沈立敬孝廉者父命交君
謂恒齋今之古人也君隱德可概見矣所著有
寄傲集藏于家今溧稱廣巖寺徐氏爲著姓云
黃汝金字西野邑庠士俊儀偉度博學著述偶試
等殺遂拂衣以山人自稱脩然物外里閭中如
武橙墩王帶河諸公皆以文藝重其人萬曆初
年邑乘重修縣令吳公仕詮聘汝金屬一筆迄
今書與山人俱名焉

陳文昭字潛孚性生澹蕩不受羈絆天賦詩才吟
詠有得不求人知明萬曆間風雅逼近盛唐昭
意在追踪李杜放遊江楚以助豪氣嘗從其族
人樂知之任武昌貳歷馬當小姑潯陽鄂渚間
在在有詩詩有竹香齋諸集藏于家後卒于客
有義僕歸其骨以葬真隱君子也

劉楚字景孫爲人好學不倦博覽群書善自吟咏

多牢騷之詞竟無志功名甘守貧賤不獲已以
身借人嘗爲捉刀以詩酒放達終于貧老有蕉
房稿清溪草諸集藏于家

武昂字元績號紆溪幼嘗入貲公家及壯不樂仕
其品行孝友生平善狀不可枚舉享年八十無
病而卒有紆溪集惠廸堂詩行世大名知府姚
汝循嘗爲志墓銘

蕭溧字世常號清源生負異格穎悟過人以不試
而業賈處人不欺出言無苟侍養父也好

孝生事死葬廬墓哀毀有涌露馴燕之徵名行
益彰族里之間婚喪衣食悉以爲賴舉鄉賓非
其意令尹欲上聞以輪幣徵遂遠遯謝之習經
梵而匪佞于佛樂山水而匪荒于嬉自明生死
刻期坐化諸子衆孫皆以詩書彬彬起溧稱蕭
族爲望云

孫謀字燕貽別號五城山陽人生明萬曆中自幼
不凡長魁梧性質朴好學任禮早遊庠屢試棄
去隱居金陵十廟山下善草楷放意詩文延師

教子與友其善以女字其子舉進士惡其人罕
至其家厭時俗衣冠澆薄着高冠重履短袖如
杜鄴之大冠間出卽以老婢持蓋市童謠之曰
五城方巾高似廟老婢打傘真可笑不顧且行
且吟得句歸多示其友林那子稱善始錄存否
則棄去每賣聯得錢卽付酒家有瘠田數畝時
歸溧省耕主城南陳躍之宅以躍之爲尉而有
品也邑中多孫五城書一日病遺言令三子耕
而讀日數畝污邪汝若合之則有餘分之則不
足無何卒有長嘯集六卷行于世

孫世彥字清寰溧水藤山人邑庠士不以諸生自
居每作文脫草卽焚去人問其故曰讀書明理
而已必欲以此取科第則聖賢之道小矣卽中
式亦一日之遇耳爲人善笑作事不苟道拾遺
金必坐待其人還之以原封上元許裕州天敘
長者也愛其人延之教子世彥敦篤課業遂十
餘年不改行居許園中如仲舒不窺許公交遊
如曹能始廷尉顧隣初太史世彥偶見之多忘

其姓字卒不一往謁許嘗以重資托雖終夜不寢性好飲而不亂間一歸里主于香山觀不入里舍人問之曰里亦客耳一日無疾終誠子荆枕流漱石之品也

姚宗儒古十六世孫也性生醇孝事父母竭力居庠序若庸夫惡衣食自甘無踰分於身外舉止若遯形滅跡者樵牧遇之以禮獨守謙吉世爭式之有友陳某病篤藥之死棺而葬之仍善其後居家惟以花竹爲四時訓子以一經杜門罕

出人稱隱德君子云

趙嘉宇君祿性孝友好儉樸隱居山林生平無疾言遠色寬和誠厚器量過人少孤嫡母抗年七十餘痼疾臥床嘉親哺糜粥躬滌穢器日夜不怠者八年順治丁亥御史毛過閭捐俸百金嘉散之以周族黨之困乏者里中苦徭稅急衣糧初爲稱貸以濟後竟破產代償之樂義好施日蓋以貧蕭然壁立意泊如也鄉人或相犯匪惟勿校設酒具食爲陳親愛和睦銷除怨咎之端

人人各如其意以出邑令數以上賓廷之不赴
子統舉康熙丙午孝廉

王象震號藝菴早年入泮因足蹇卽慕尚高逸好
陽明公之學天性孝友父老病侍養與同臥起
與人交一以誠所著有約樂居質言二十卷藝
菴詩稿二卷藏於家

任其寵義民任義洛陽縣令任蘭之後生而穎異
嗜古學英年入泮屢困於場屋時賢惜之爰年
九十餘與其弟承歡膝下鄉人喜曰今日復見
萊子矣平居律身端恪及其接物藹然飲人以
醇晚年棄舉子業徜徉山水間有落花三十首
併詩集行世簡學憲隆以鄉飲介賓有以
其宿尚義急公肯佐縣令賑饑任師錫爲廩庠
亦邑中之表表者

蕭逢會幼聰穎好學爲諸生時試輒高等事親克
孝昆弟和好無間言後因目疾隱居山中諸子
侄列膠庠者時親其教誨生平磊落不羈縱譁
當世務豁如也薦紳先生雅重之

章經國字治之幼孤有志自立事寡母至孝入泮
後舌耕以供甘旨性溫和無少年習氣交友以
誠數十年如一日也後授補太學生大司成
喜其文特優拔之以養母不仕暮年杖履逍遙
惟以詩禮訓子弟孫時斗爲邑庠生工於舉子
業益其遺澤云

葉文權字衡卿英年入太學博習書史識者以大
器期之性孝友父年老患足疾朝夕奉杖屨如
童子時昆弟相愛敬出入必偕居家樸素不飲
酒教子有方鄉黨中推爲善士晚年盤桓泉石
足跡不入公庭歲荒分糧活窮餓者邑令嘉其
行誼舉鄉飲介賓

耆德

國朝

蕭有弘性慷慨心坦易喜琴書善詩賦于順治丁
酉年尚義急公爲合邑疏復永折事艱於用費
多所稱貸事至庚子年告成稱貸無出獨破產
賠償之合邑紳衿因念爲公獨累具結申請

撫院張諱中元獎之曰澤被蒼黔遂舉鄉飲賓

張守望幼年割股以療母疾明季捐貲倡義捐造

洪藍埠大橋 國初有遠商尚姓者賃寓其家

及歸遺忘銀五十兩在所臥床下久許其人復

來以原物還之封識如故年九十餘尚閱古書

不倦公議舉鄉飲賓以衰老辭庠生嘉祉其次

子也

甘應星別駕甘永昂司理甘永晟後裔生平忠信

樸直孝友謙和康熙間舉鄉飲賓

周應珖性篤實克盡孝道族黨間有饑寒者嘗分

衣食濟之康熙十四年舉鄉飲賓

姚光禮學博宗文之裔孫也天性至孝曾割股以

愈親疾內外稱之無間言尤輕財好施邑有改

折之舉捐家財無恡色亦無取償于人者邑令

閔公重其品行延至賓筵待之有加禮上臺俱

給有扁以旌好義云

蕭士經者逸也蕭氏爲中山世族士經天性溫厚

志量過人家庭間極其孝友尤慷慨好義歲早

協助賑饑多感頌者邑中興大功嘗賴以告竣如學宮明倫堂尊經閣及積慶橋均與有力焉令尹閔公泐魯馮公泰運李公作楫學博朱公宏憲府佐朱公瑛高淳令崔公掄奇均以扁額贈之康熙六年舉鄉飲賓嘉其功重其德也生三子長必祚次必祺俱入府庠

龔 靖性謹厚喜讀書家徒壁立竭力以事二人所知交盡博雅君子中年遨遊山水間精岐黃之術活人甚多府佐縣令皆優禮之舉鄉飲人

賓

流寓傳

周

左伯桃 羊角哀二人戰國時燕人也平生為死友聞楚王賢善待士乃同入楚經溧水值雨雪糧少伯桃乃併糧與哀令入事楚自餓死于空樹下哀至楚為上大夫乃言于楚王備禮以葬伯桃今孔鎮有墓在焉

伍員字子胥楚人也父奢爲楚平王殺員奔吳流連于瀨上乞食有史氏女以壺漿食之太史公曰子胥窘于江上無須臾忘郢隱忍就功名非烈丈夫孰能致此哉後員投金瀨渚以爲報按戰國古文云勝國廟記謂楚靈王與吳戰吳陷瀨渚卽此也員實足証瀨名焉

漢

嚴光一名遵字子陵會稽餘姚人也少有高名卽避之偶爲光武之故人竟以被召不屈顯其名遂使後世稱之無窮今東南指爲嚴陵釣處者比比焉在溧水則邑之東有廬山者相傳以嚴陵結廬於此而名果有之必在始變姓名時也蓋從此轉而入齊國矣

唐

劉太真字仲適宣州人少負才與其兄太冲齊名嘗從蕭穎士遊穎士奇其文謂時輩莫能偶也天寶末登進士累官禮部侍郎時德宗雅愛才與群臣宴曲江御製詩簡文士三十八人應制

詩上德宗親第之以太真居其最嘗掌貢舉所

進多貴家子時論少之尋貶信州刺史卒餘已

見祠墓下

又有顏魯公送其兄太冲敘碑存學宮舊志稱有杜子源記散逸無考今

考出並蕭穎士敘補載藝文

南唐

韓熙載生五季北海將家子也唐明宗時熙載自

度無可為廼南奔吳吳弗用也遂事唐會李昇

志不欬有所為亦弗及用也事李景始以直諫

聞有陳覺者景幸臣也又黨於宰相宋齊丘嘗

未幾熙載卒煜終以不一相熙載為憾贈以平

章事後李煜政益荒熙載死五載而南唐亾

舊志吳仕詮曰余聞溧水南僻壤中為熙載

讀書處其址尚有可考者因謂熙載生於叔

世既數易主而不遇何不效虞卿窮愁著書

俾後世足稱焉顧廼齷齪自汗好魏公子之

所為而未盡也亦謬矣然史氏顧譏之謂李

穀至而熙載不能有所為也嗚呼藉令一殫

熙載才郎周宋未可得志何論一當李穀哉

宋

王端朝字季羔澶洲人少好學歷官至承德郎高

宗南渡時浮家於此詳見端朝所撰正顯廟記

溧陽新舊志皆載王寓溧陽未詳廟記耳

趙林南陽人宣和中徙溧水見隱逸傳

施鉅山東曲阜縣人登宣和壬戌進士高宗南渡

偕次子恭隨駕詣建康累官叅知政事陳固守

之策不報遂以疾辭卜居溧水清約自持無聲

色之好壽終九十一今溧水施為著姓代有文

賢為沔陽教授一鰲者其十三世孫也

姚古字季嬰其先山西太原人少有勇畧長善騎

射靖康間金人圍汴古率熙河師入援子平仲

亦領步騎七千勤王拜為督統制與宣撫使种

師道合力捍金平仲夜斫敵營奪康王不獲力

盡而敗入青城山思再舉及高宗南渡古護駕

建康卜居溧水遂為溧人今子孫繁衍溧稱姚

氏云

茅壽字惟厚汴人也官提舉建炎元年與宋臣李

綱等力主征討之謀爲黃潛善汪伯彥所譖被黜從高宗南渡家溧水終身不仕後裔甚繁至明初因遣戍分爲茆毛二姓至今稱著族云

明

嚴謙號胥溪隱士生平未詳永樂初知縣趙文振奉勅祭徵士嚴謙墓于溧水知隱士名文振有輓詩載藝文

姚崇文永樂間爲溧水教諭因家焉歲己卯舉于鄉者邑有六人崇文作詩以紀其盛有麟洲一舉六鰲連之句今溧稱南門姚是其裔也

吳姓字鹿友別號柴菴揚州興化縣人官大學士以閣部督師道出江南突遇北變至止溧水遂卜邑城大中街居焉顏其堂曰嘉遯邑有改折之事公首倡議阻於時世事雖未就溧民感之遊東廬山壽國寺作記勒石邑中忠孝節義多贊傳以表章之載藝文志

李可埴湖廣長沙人爲溧水令阻于亂勿得歸因家焉見官守傳

游應龍號雲石湖廣安陸人崇禎間舉于鄉嘗爲溧水令值左鎮兵亂無家可歸卽居于是無何抑鬱以卒葬縣東五里戴家橋有墓在焉

仙釋傳

晉

黃初平晉丹溪人丹溪古縣在溧水之烏山跡猶存焉初平是此所生考尚友錄所載晉書云初平年十五牧羊遇道士引至金華山石室中四十餘年其兄初起尋得之而溧亦有金華山叱

石處議者謂浙金華節有金華山欲以初平爲浙人則浙志未指丹溪人則初平爲溧人無疑仙踪何往不到且四十中飛昇無定今以丹溪爲據則不誣矣初起見平叱石成羊亦棄妻子學道成仙宋元皆有封號

古拙和尚洪武七年住邑東之壽國寺有戒行不言其何自來嘗自號藕花道人又號雪川子人遂疑其爲吳興人人呼之者則惟以古拙和尚云與王觀察良爲方外交有支許風尋入白下

時時以詩相聞舊志載其一詩有云泉鳴知宿
雨木落見秋山亦何滅賈浪仙又云避世紐蘭
佩似有托而避者惜未見其全稿

孫鏡有苦行嘗結廬於縣北官山之崖聞者踵其
門因他徙後入天闕山終焉

許真人不知生何時相傳真人字敬之汝南人也
嘗寓溧之豐慶鄉講黃白之術聞者未之許也
獨邑人劉黃者好之後聞登西山冲舉而去
古心法師溧水人姓楊名馨幼從素菴法師于金

陵棲霞寺得大悟後往五臺山有金甲神夜報
僧衆謂有法師至早迎之山下至中途果得師
禮供上座萬曆間陳太后勅製衣鉢各萬二千
五百數勅師說戒于五臺畢仍歸棲霞開戒僧
衆求從不可勝紀時三懷法師修報恩寺塔頂
不能上夢神云待波離尊者至次蚤師至三拜
而舉頂上後圓寂于古林菴塔安德門外天龍
寺

忘所和尚金陵永寧寺僧也崇禎年間大理寺正

卿徐良彥因溧水永壽寺原徐公鼎建見念所
有修行委爲本寺住持念所善詩文每升座講
經必引儒家五經正理互相發明就講者咸念
爲釋典絕口不譚衣食事或爲之謀者謝曰我
出家漢雖凍餒不足慮也何藉此住數年復之

金陵永寧寺化去

武光輔少失父性至孝行事非母命不自專習學
有悟毋令援監勉從之非其志也及壯以母老
不忍仕居常好游山水意若有所尋覓然終無

所取也忽偶納涼戶外手舉太癸若一葉人以
千百斤巨石試之若弄丸乃知其神力又嘗在
國學值修造群匠昇一石不起光輔以一手捫
之卽飛走大司成見詫曰吾門有扛鼎耶善画
竹葉如生每以自娛不爲人所強讀書隨卷輒
盡但點頭微笑而已母卒遂學道服方外衣束
雷公緜持匾竹杖出入飄然一日命肩輿曰吾
欲有所往行數里叱歸喚家人具湯浴罷焚香
端坐而逝越月餘里人自廣陵歸聞其死驚訝

曰某日在廣陵道上與語良久親見繚杖如平時儻然而別叩家人卒之日乃卽遇之日如汪台符蝦蟆石尸解事

武蓬頭年未二十如老人性與俗迂不知時務不冠不履任其髮之雜披因號爲武蓬頭頭一日走鎮江何氏習太素脉七日得訣歸軫人決生死悉驗往往語未來事自刻死期人以其爲風狂至期微笑曰吾與君等別矣始知仙去

蘇門和尚楚人也慧根宿植究心內典尤工詩等

有青桐集參天童後掃空萬緣不立文字稿遂逸崇禎未遊金陵四方聘請者踵接頓思山隱乃卜橫峰翠雲深處古草堂庵以居入山杖笠自隨見晉巒聳秀泉壑幽清卽此終焉埋名苦行不類凡僧戒律精嚴焚修澗僻隆冬午夜見火燒山登巔撲滅救百虫群鳥救萬億順治二年兵亂過郊騷擾獨一庵晏然遠避賴以全活者衆人感恩報德力請開堂闡教以酬萬一乃固辭無何示寂衆于庵前建塔檢筭中殘

篇刊行以見道風之緒餘云

中山大居士劉懋襄字惟贊號萬全游庠肆拾叁載博學多才端方正直屢科不第晚年入山修道閉關貳拾餘載務要了徹大事時七拾七歲康熙拾陸年也江西寄庵大和尚付囑源流拂子為臨濟叁拾捌代法嗣法名起祖別號覺了註金剛並解心經正傳歷世清言勸善名編諸書嗣刻中尊李作楷贈有為額人天勝地劉登科屢請介賓堅辭不赴山居百須付梓行世

雜志

溧水溧陽舊多蠱毒丞相韓滉之為浙西觀察使欲絕其源不可得時有竹林寺僧每絹一疋易藥一丸遠近中蠱者多獲濟值滉小女有惡疾浴于鎮之温湯即愈乃盡捨女之粧奩造浮圖廟于湯之右翼得名僧以守有以竹林市藥僧應者滉欣然迎置且求其藥方久之僧始獻乃刻石于二縣之市唐末喪亂石不存鎮之夏氏世傳其法藥以温湯為名誌其所自也用五月

初生桃皮末

二錢 生用

盤螯末

一錢 先以麥麩炒去翅足

大戟末

二錢 生用

三味以米泔淀為丸如棗核形中一切蠱

毒食前用米泔下一丸脩合時于淨室中忌一

切婦人孝子猫犬見

金陵志

唐文宗開成二年丁巳春三月邑掾翟畋督工市

民鄉庶于縣治圍中大樹下築土壇掘茅祠奉

白府神號忽有白雀巢于屋上紫芝生于堦前

唐武宗會昌四年甲子二月庚申朔旦翟畋入白

府祠焚香祥雲騰遶瑞氣綑縕見一金甲士立

於壇前自言吾乃定波侯李貴掌管江湖河海

息風平浪救護舟航奉上天玉勅命吾來為白

府君督廟言訖畋遂遍謁邑中士庶至而仰之

遂失所在以其事上聞奉旨即將縣治改建為

廟移治於街西酒坊邑民父老不憚千里賫香

往下邳迎請府君神主入廟凡遇水旱民患詣

祠禱之速有感應

城隍廟志

張俊者宣州溧水縣尉元澹莊客也其妻為虎所

取誓欲報仇乃挾矢入山於近虎穴虎上大樹

伺之乃見其妻已死為虎所禁屍自起拜虎訖
自解其衣裸而復僵虎又于穴中引四子皆大
如狸掉尾歡躍以舌舐其妻虎子競來爭食俊
連射斃之截虎頭併殺四子負妻屍歸

陳眉公
虎薈

明世宗嘉靖四年重修溧水城隍廟殿閣一夕風

雷大作東北一柱神自豎立

廟志

姚守元者少讀書至士不可以不弘毅慨然嘆曰
士貴有為也不徒章句以了生平每見當為之
事即勇于行道有殫者乃施棺以掩瘞至百餘

木守元艱嗣祈城隍見廟池宜梁獨力造之不
計費經始于明天啓癸亥三月之朔次年以是
日得子邑人咸知其事信為樂義好施之報

山陽鄉武姓家倉稻一宿飛出如蚊聚成毬農人
荷鋤見而格收之頃刻落地至數石

順治七年

山陽鄉民家有雛雞出殼即啼

順治三年

死後現影有徐學忠者字敬所生平樂善好施里
人德之早喪妻劉氏終身不娶人望之若仙以
崇禎己卯無病坐化去停柩在堂延僧禮懺忽

緣燭光現影堂壁鬚眉宛然隣里來觀咸謂生前善行之報頃之燈燭息而影亦滅及出葬時異香凝室不散道路皆聞人共異之享年六十五歲豈其尸解去耶子有聲邑庠生也

萬曆十五年一舩過天生橋下約有十數人忽見河中一大魚如三十斤者躍而上山舟中人競上索之而山上大石忽墜擊舩遂沉至今此水道竟塞

見漱石閑談

順治四年天生橋土人初建土地祠適脂湖村有

神降于樹云余廼胡相公也今爲神天生橋樹

吾像也耕者異之昇至廟爲首者驚曰昨夜夢

神曰余非土地何用泥土爲自有送木來者今

果符矣何顯應若此神蓋曹村人姓周名瑚字

文卿生有異徵長而聰穎篤行孝友年七十四

卒卒時其妻武氏遙見有衣冠偉人拱手迓之

其子亦夢父俯伏堦下若迎詔狀後廟隣具道

所夢于其子因出其父之遺像示之與夢之所

見宛合然後知向神之稱胡相公者乃其諱也

共尸祝之頗著靈應云

給事姚文然有碑記

漢水縣志卷之八

藝文志

頌

漢

趙勳

校官碑頌

蓋漢三百八十有七載于
銘工著斯金石界誅曰溧陽長潘君諱

乾字元卓陳國長平人蓋楚太傅潘崇之末緒
也君稟資南之禱天德之絕操髻髦克

敏契聖抱不測之謀秉高世之介屈私趨公即
儁契聖抱不測之謀秉高世之介屈私趨公即

仕佐上郡位既重孔武赴著疾惡義形從風征
暴執訊獲首除曲河尉奮奸刻猾寇息善歡履

孤竹之廉蹈公儀之潔察廉除茲初厲清肅賦
仁義之風之跡垂化放乎岐周流愛雙

乎親賢寶智進直退慝布政優優令儀令
 色獄無吁嗟之寃野無叩匈之結矜孤頤老表
 孝貞節重義輕利制戶六百省無正繇不責自
 畢百姓心歡官不失實於是遠人聆聲景附樂
 受一廛既來安之復役三年推泮宮之教反失
 谷之禮構修學宮宗懿招德既安以寧于侯
 張籩豆用陳發彼有的雅容聞鍾磬縣矣于
 胥樂焉乃作敘曰翼翼聖慈惠我黎庶貽我
 君來茲溧陽彬文赴武扶弱抑強刈懷雄流
 惡顯忠咨疑元老師賢作朋修學童冠琢質繡
 章實天生德有漢將興尚旦在昔我君存今即
 此龜艾遂尹三梁永世支百民人所彰子子孫
 孫俾爾熾昌承沛國銍趙勳字蔓伯光
 和四年十月巳丑朔二十一日巳酉造

附釋文

宋紹興十一年溧水尉喻仲遠遠得于
 固城湖濱置之官舍今在孔聖之門

長樂陳長方雖嘗碑其所得本末釋文則未之
 見碑以靈帝光和四年歲在辛酉迺距今凡

千一百五十年番陽洪景伯先生出字為之
 釋謂挈為契犂為犁早為俾樹為野資為責刻
 去其乃賢去其貝于侯與豸侯通尚且謂太公
 周公可謂精審有據其餘不可辨者尚有二十
 七字今觀首行自三白字以下止斯字凡十有
 六字比之洪氏作釋文時又皆不可考且如第
 二行之字之下是禱字禱下闕一字有天字敏
 字之上是克字象之下是儻字退之下是慝字
 役之上為復反之下為失此之上為即皆隱隱
 可見洪則悉以為闕又如既安且寧則以為呂
 寧梅檜則以為桓檜豈當時誤于墨本而然耶
 溧陽志謂元貞是人以名乾而傳會也至順癸
 酉敎授濟
 陰單禧識

碑銘

唐

瀨水貞義女碑銘

李

白翰林供奉

皇唐葉有六聖再造八極鏡照萬方幽明咸熙
 天秩有禮自太古及今君君臣臣烈士貞女采
 其名節尤彰可激清頹俗者皆掃地而祠之蘭
 蒸椒漿歲祀罔缺而茲邑貞義女光靈翳然埋
 冥古遠琬琰不刻豈前修博達者為邦之意乎
 貞義女者溧陽黃山里史氏之女也以家溧陽
 史闕書之歲三十弗移天于人清英潔白事母
 純孝手柔荑而不龜身擊漂以自業當楚平王
 時平王虞忠助讒苛虐厥政芟於尚斬於奢血
 流于朝赤族伍氏怨毒于人何其深哉子胥始
 東奔勾吳月涉星遁或七日不火傷弓于飛逼
 迫於昭關匍匐於瀨渚捨車而徒告窮此女目
 色以臆授之壺漿全人自沉形與口滅卓絕千
 古聲凌浮雲激節必報之讐雪誠無疑之地難
 乎哉借如曹娥潛波理貫于孝道聶姊殞肆擊
 動于天倫魯姑棄子以却三軍之眾漂母進

沒受千金之恩方之於此彼或易爾卒使伍君
 開張闔閭傾蕩郡郢吳師鞭屍於楚國申胥
 血於秦庭我亾爾存亦各壯志張英風於古今
 雪大憤于天地微此女之力雖云為忠孝之士焉能
 咆哮烜赫施于後世也望其溺所恰然低迴而
 不能去每風號吳天月苦荆水響像如在精魂
 可悲惜其投金有泉而刻石無主哀哉邑宰榮
 陽鄭公名晏家康成之學世子產之才琴清心
 閒百里犬化有若主簿扶風竇嘉賓縣尉廣平
 宋陟丹陽李濟南朝陳然清河張昭皆有卿才
 霸畧同事相協緬紀英淑勒銘道周雖陵頽海
 竭文武不死其辭曰粲粲貞女孤生寒門上無
 所天下報母恩春風三十花落無言乃如之人
 激漂清源碧流素手縈彼潺湲求思不可秉節
 而存伍胥東奔乞食於此女分壺漿滅口而死
 聲動列國義形壯士入郢鞭屍還吳雪耻投金
 瀨汜報德稱美明
 明千秋如月在水

白府君墓志銘

白居易 太傅

公諱季康太原人秦武安君起之裔曾祖諱麟揚州錄事參
 都督祖諱志善尚醫奉御父諱麟揚州錄事參
 軍公歷華州下邳尉懷州河內丞徐州彭城令
 江州潯陽令宿州虹縣令宣州溧水令歿於官
 舍明年某月某日歸葬下邳某鄉某原享年若
 干嗚呼公為人溫恭信厚為官貞白嚴重友於
 弟兄慈於子姪鄉黨推其行交游讓其才自尉
 下邳至宰溧水皆以廉潔通濟見知於郡守流
 譽於朋僚才不偶時道屈於位而徒於州縣竟
 不致於青雲命矣夫哀哉公前夫人薛氏先公
 若干年而歿生二子一女號鑒虛未笄出家長
 子某杭州於潛尉次子某睦州遂安尉後夫人
 高陽敬氏父諱某某官生一子二女皆早歿子
 曰敏中進士出身前試大理評事歷河東鄭
 州寧二

明

端木府君墓志銘

宋 濂 大學士

既嫁以和柔從夫為順婦及主家以慈正訓子
 為賢母故敏中遵其教饒其身聲名甲科歷聘
 公府以文稱於眾以誠養榮於親雖自有奇材
 然亦由夫人誨導之所致也夫人以泰和七年
 正月某日寢疾終於下邳別墅享年若干明年某月
 某日啓溧水府君薛夫人宅兆而合祔焉禮也
 時諸子盡歿獨敏中號泣喪事托從祖兄居易
 誌於墓石銘曰繁我叔父溧水府君治本於家
 政施於民繫我叔母高陽夫人德修於室積慶
 閨門訓著趨庭善彰卜隣故其嗣子休有令聞

予友端木君以善既卒之一年其子智來經踵門
 泣拜而請曰智也罪戾深重禍延先公以洪武

癸丑三月乙卯卒于南京之官舍壽僅五十又
 三遂以是年某月某日塋于嶼山東村之原竊

惟先公自少有志事功其善政在人者今多能
 言之又十年則言之者或寡矣又十年則無人
 能言之矣此無德人遠者其言淫世易者其事
 晦亦恒理爾一念及茲寧不使人興懷乎然而
 托名文辭者可以垂之無窮千百歲猶夫一日
 也此為人子者所恃以無恐願先生進之按學
 子劉剛狀君諱復初以善其字也姓端木氏其先
 為衛人出于孔門弟子子貢之裔今獨以端木
 氏者從省文也一遷于大梁再遷金陵焉衣巷
 三遷于深木縣之巉山其詳備見譜圖記中曾
 祖時中祖安父邦達姓某氏君有遠志不肯寂
 寂落人後至正初以儒試吏江南行御史臺同
 列多貴遊子弟爭事表祿君獨泰然不失其恒
 行久咸畏服之俄遷書吏右憲部君佐部使者
 行州縣彰善癉惡威聲獨著聞會四方兵動東
 南為尤甚君袖策言時政之急如此則可守如
 此則可戰否則有斂手就降而已上官聞之皆
 落落不合君仰天嘆曰彼以吾發狂言耶時事

從可知矣於是悵然有鄉土之思溧水道絕不
 能歸僑居金華日以書史自娛至正己亥皇上
 親御六軍取金華命常忠武王鎮之王聘君至
 幕下未幾君辭去會有言于朝者癸卯三月召
 為徽州府經歷徽為江東大郡政繁而賦殷君
 悉力佐治百廢具舉勇則歸于其長田賦久不
 均民不堪命君歸城東建局使民自定田集為
 圖籍覈盈胸驗虛寔而定科繇吏民陰為歎弊
 痛論之不數月而畢由是民無遺租官無橫歛
 三皇孔子廟皆築臺門旅館之制亦廢君或葺
 或建咸中程式賦不及民皆若不知者丙午冬
 改通判吉州府吉俗尚譁訐素號難治君召父
 老子弟戒之曰予聞爾民尚豪侈樂訟鬪朝廷
 子惠元元春雨秋露無不霑濡爾曷為良民以
 報上德寧梗化以自戕耶梗化弗祥天刑所不
 貸爾其識之民皆惴惴無敢執牒矣訴者丁內
 艱服除洪武辛亥春被召赴京除磨勘司丞時
 官新署立凡泉粟之出納刑法之是非物貨之

變易無所不當獻君從本達支自流徂源勾稽
 隱微纖芥軒露每一奏對上輒延譽之未幾陞
 為令君嚴于限域人見輒畏不敢有所請托俄
 僚屬皆以貪墨敗磔首東市惟君能獨存清白
 之行益表見朝著間冬十一月超授嘉議大夫
 刑部尚書君之用刑本諸法律而持以平恕老
 于議法者咸以為允杭州馬甲飛糧事覺逮繫
 者百餘人詔君往治其獄分群囚別所人各鞠
 之合其辭參焉同多者情真否則偽郡守以下
 皆服罪壬子春三月拜湖廣等處叅知政事階
 中奉大夫湖廣素號重鎮屬兵戈蹂踐之餘土
 曠民稀君首下屬州民復業者復其賦一年次
 閱定書九糧儲轉輸錢帛出入與夫軍裝工役
 皆預為計畫且會官屬問事不集者其故何繇
 皆曰一省所轄府州縣二百有餘遠者在千里
 外每官多闕其事因不集君奏請于朝擇在職
 賢良吏攝其政不數月無事不舉民驚以為神
 既而以事召還京師俄以疾卒先配石氏前卒

繼王氏子四仁義禮智皆石產也仁先卒君
 性甚孝自遊宦四方不能奉驢膝下心常歉
 然所得祿賜恒歸以娛親其奉已則泊如也
 既卒一念及之輒潛然泣下居官能守貧嘗著
 座右銘曰為官寔難貧然後安事有不可急中
 存寬又曰心契上天脚踐寔地人謂其能自警
 云君狀貌秀偉美鬚髯音吐鴻暢或治政弗暇
 休則焚膏命諸子環侍取書之嘉言善行歷
 歷剖戒至夜分乃止故翰林學士朱升嘗謂君
 為人其謙退似懦夫其專謹以腐儒瞻視精悍
 似俠容掀髯談世事似辨士而其精神超越天
 似逸神仙者君子謂為寔錄子托交于君頗久
 而著勲焯能匡後死者之責銘烏乎辭然而年
 日已邁文日以衰無以應四方之求近因燔毀
 筆硯一切謝絕之而中心猶以為未慊也雖然
 智之所請則有不得而忘情者遂備采剛之所
 錄而繫之以銘銘曰惟士也良有志則剛如扶
 干將始晦而夷出遇而熙一躍而飛筮仕府僚

因賦定繇功而不驕轉佐方州革俗以諭訓言
繭抽磨勘設曹蠡絲牛毛孰得而逃進領愁卿
邦憲是經中乎準繩往蒞大藩以執政原江漢
又安材長如何壽則弗多其如命何有子治經
足繼簪纓縱死猶生囓山
之原木古泉寒銘在不刊

大和堂銘

王從善 知縣

天之生人懿哉恒性五倫萬物厥理自定人惟
不行達道以病匪曰斯民過在於令而我腐儒
實慚有靖奉此一心沛之群姓士夫相安吏民
無競惟餘誰屬怡怡通共遂顏斯堂文章昭映
風流將及世道之幸
祝規有辭此感彼應

譙樓鍾銘

并序

王從善

大明嘉靖癸未予自西臺試政出守深永又明
年丙戌積滯漸通民氣稍樂乃尋制之未幾

因取譙樓之鍾而新之嗚呼今之人懸情於
載之下後來者仰慕於千載之上虛堂風雨
音動懷蓋有不勝其慨嘆者矣然而風烟逝波
須臾變滅不有道在其何能存攸以識歲月復
為之
箴

明

勸民崇學箴

吳仕詮 知縣

學有殊途古乎今乎人已之判公私之符學而
崇古學聖為徒即知學矣猶勝凡夫道本無涯
學焉可止畏高者早畏遠者邇庸人所安志士
所恥進修及時顯蒙伊始嗚呼良玉為器惟琢
乃成太阿在冶惟鍊斯精人胡不學自負厥靈
吾寧學而韞匱母不學而穀業毀于嬉功備于

篤吾於爾也不免于教
民是屬而敢以茲言勗

勸民務農箴

吳仕詮

民生邦域惟食為天足食有本稼穡急焉豐不
怠匱為患未然一年力穡三年蓄利不為之豫
孰為之繼私何以安公何以濟爾田可耕爾井
可鑿為力則勞于心則樂統緒者誰農焉是薄
朝而溫飽夕而溝壑嗚呼五穀不分將何聊生
民無聊生國無日寧弗勤胡獲弗耨胡成柰何
些情自墜厥生吾於爾也寧
罪民是矜而必游民是懲

勸民息訟箴

吳仕詮

聽訟非罕無訟則賢宣尼有詔民畏為先云胡
末世携詐紛然錙銖必量睚眦是競巧舌如簧
百端求勝庭而聚訟退驕諸野或錫鞶帶養
三禿嗚呼爾將害人亦爾傾爾欲自寧不
國爭彼以強凌吾以弱守循理無尤樂斯可久
若於爾也豈以折獄是能而唯爾之察枉直既
形難貸者法爾無
終訟自貽厥罰

勸民止盜箴

吳仕詮

寇盜何始蚩尤之時彼誠無知暴寔先之今也
何世爾輩美辭國有恒憲赫赫無私相彼下民
良心匪獨偶迫飢寒真元遂涸一夕不省終身
桎梏顯者刑刀微者撻辱嗚呼爾之為計以力
以智以爾智力何所不至爾其更始議在緩死
拔爾蓬心皆吾赤子吾於汝不教而殺是上
之虐爾或不悛吾
以行吾三尺之法

贊

宋

校書郎俞良弼像贊

功名老手科甲英賢代仕堅貞之任振古節使
之風大唐韓愈舍子誰歸而今而後翰墨存芳
矣

廉 大子中

狀元俞卓像贊

蒲宗孟 右丞相

魁名天下釋褐一人入司文翰出攝兵權對衣
金帶國士無雙該顯謨閣述古殿之再造英雄
也

元

三烈贊

仝

張 蕪 潯國公

歸德趙雷澤二子棟之婦夏楷之婦劉與弟宗
澤之婦衡也方金陵破雷澤之弟與楷家居見

害三烈誓不辱偕沉於水時雷澤與棟出宗澤
亦以他事幸免予太史也哀其事嘉其節輒倣
古義號以三烈為之贊曰漢有三貞居巴閬間
日著義華罹禍黃巾確不受辱投軀江垠家有
三潔家汀秦寧山獠劫之義不顧生女暨二嫂
沉於清冷今趙三婦衡夏劉姓建業之陷臨節
委命皆以水死風節相應時惟雷澤將棟督餉
匯澤亦從宗則使杭其季惟楷在伯氏傍伯也
既隕楷亦見殺壯衿胥肥聞者動魄堂堂一門
天清月白彼從逆儔本我王臣膝一屈汚終古
莫伸妹之弗如犬豕厥身我作是贊用揚高
節後今千載正貞侔潔金石其文永稱三烈

明

古義士羊角哀左伯桃墓贊

徐良彥

知縣

羊角哀左伯桃為死友聞楚王賢往見之道遇
雨雪計不俱全乃併衣糧與角哀入樹中死贊

曰生則兩死死則一生含笑入樹何友非身樹
既摧殘墓亦滅沒先生之神獨耀今昔仰止高
風愧此隙末予立
貞珉匪捍樵牧

壯士陳翁贊

陳函輝

天台人

余在江城有中山陳生茂林者以工書來見望
之則昂然雞群鶴也一日出乃祖家傳見眎讀
之驚喜世間果真有龍伯巨人乎恨不起翁於
今之世授以壇乘鉞之任徒嘆太平遺老滅
沒於菰蒲踐更間耳因為作贊贊曰叔梁翹關
生有異力李廣射虎宋萬裂革唐有令文手擘
獅石一履尺五宋則文德其諸勇悍列在史冊
翁起田家好誼質直鍊射如鼎舉若籜釋徐夷
躡踪來窺小邑挈繩飛輪如矢之直夷皆咋指
捨去莫留偶入都城觀者擁塞俛首歸來埋光
鏟跡明智淵誠內行潔白得全於天耄壽正贊
世多焦僥飽死道側偉人間生亦乏賞識長鑿

大劍凌烟繪蹟弓藏有悲或因奇特不
如毛錐優游藝室有穀爾貽善刃而息

溧水張氏節孝贊

吳

牲 大學士

吾聞死易惟立孤難嗚呼毛母矢志單寒和熊
迪訓緝績佐餐慈因孝著節以義完厥子克家
才為國華砥行頹俗德音孔嘉何以
顯親感格幽遐心既匪石鐵葉生花

傳

元

節義傳

陳祖仁

翰林學士

傳曰千金之子不垂堂百金之子不騎衡此言
其身貴則愈益慎重之也豈惟富貴雖華門空
室褐衣疏食之徒彼自視其身與千金百金無
異設使其貴足以自裕其才魁偉築負頤氣指
卷之八

使一旦觸箴刃蜂蠶之害不啻毫髮亦無不變
 色而改度者此人之至情非可誣也然而斧鑕
 之慘懸絕蜂蠶鼎鑊之酷殊異箴刃則有慨然
 談笑趨而踏之若履平地無難者豈故棄捐其
 生與人殊哉彼其根於心者固已貫於金石久
 於天地光於日月非死生所能變也余觀兵興
 以來侯王牧守下至匹夫匹婦不屈於兵死者
 甚衆亦往往傳誦於人不幸卒然玉石俱燬
 沒於空山絕漢人無聞之者蓋不少尤足悲也
 乃今趙龍澤等事以命授升斗之祿其婦人女
 彼其男子未嘗霑一命授升斗之祿其婦人女
 子又惟織紵飲食是儀其見聞不出閨闈乃皆
 一時捐軀効死若夙昔相要結亦何心哉由此
 觀之與天地並立無媿者在此不在彼夫然後
 其身未嘗死而名永長存在春秋法所當書者
 趙龍澤者其先河南睢陽人也父鑑嘗知婺源
 州家建業之溧水四子龍澤雷澤宗澤瀟澤而
 龍澤最長天性孝友有司舉教授一就職即棄

歸養時汝穎兵起官軍不能支乘勝渡江急攻
 建業臺軍城守力訕遂陷兵入城大掠以及龍

澤執求貨貝逼受命龍澤曰吾家世儒義不受
 辱又逼使拜寧死能訕身拜耶兵怒殺之雷澤

時以西浙鹽運司判官居憂且滿行臺檄委督
 餼屬縣二子棟楷屬楷于家而以棟及弟匯澤

從行兵欲羅致用之皆私計曰我言則生不言
 則死然言之兵或害吾父是我害之也假幸而

免是我陷之不義也二者均為不孝雖生不如
 死竟不言亦死雷澤聞之遂得逃去初城且陷

宗澤妻衡氏謂棟婦夏曰事棘矣可柰何汝姑
 年高而汝姊婦劉夫在也或可免惟吾與汝年

少而夫且出不豫為計必辱夫子吾與若寧死
 也夏曰吾意亦然即共赴池水劉聞之嘆曰嗟

乎吾夫子且不自保能衛我乎亦死于水時楷
 未遇害故云然惟宗澤佐書行臺以公事如浙

西故不及難後七年闢臺監察御史福建左丞
 李士瞻以聞于朝贈龍澤浙東帥府照磨楷南

安尉後二歲余自張掖召還始識宗澤愛其恂
恂雅飭因以信龍澤為人而今之學者願先三
烈婦附離龍澤於義弗順易稱父父子子兄
弟弟夫夫婦婦而家道正矣其下歲月濡染不
言而喻跡其或死或生或先或後或久或近蓋
不失其正厥有絲來非偶然者余故推本龍澤
哉人知鄉本遯源
而亂者或少衰焉

明

夔州府經歷蕭公傳

端木孝文

翰林院待詔

余與蕭君文舉同在禁林時時稱說古今人遺
事讚誦之餘輒寄管城亦善善之性然也一日
文舉挾其大父夔州君之狀丐余為傳夫夔州
君固余之宿所稱說讚誦者其平生喜讀書尚
大節往往往轍俗儕古傾敬信開黨聞由辟召為
夔府府經歷經歷散秩也公無所盡其剗剗才願

乃問古人蹟如白帝城越公樓先主武侯廟八
陣圖石永安宮址與灤西灤赤甲諸勝命駕
賦詩露胸中奇守知其欲用所未足也因以吏
事委之州瀕江夙盜藪吏不能詰公策捕其魁
探丸者屏跡絕蜀初定夔當峽口衝稱咽喉要
區聚戍卒屯田其間守命公兼綜之公按修孟
珙遺法盡水利策疲憊得穀視他屯最守大奇
公材以政績上當顯擢而是時太祖得天下新
持刑亂國用重典之說頗尚法吏有小過差輒
黜戮人咸惴惴立公素少宦情遂謝病歸公諱
叔裕先本蘭陵自建炎扈遷後世為金陵人
陵地沃漸六朝侈靡習公性嗜澹樸弗愜也遠
卜遷于我溧百堵既安畎疆載闢爰徜徉講酒
社中而一時鄉祭酒多慕與之遊其時文舉方
總角英英異常兒如長文之在太丘前也都憲
姚公器之願以愛女侍中櫛未及御輪而公先
耄年考終矣嗣後文舉用上舍異等入玉堂與
余同署耳公行事甚熟微文舉請余方欲勞管

城力况聞命而却之
哉謹撰次之如左

義僕傳

陳文昭

邑庠生 見隱逸

陳子曰余嘗讀東漢書至李次孫傳未嘗不掩卷太息曰嗟乎嬰杵而下寥寥千載廼有斯人雖然嬰杵客也事稍近名二人相得黽勉同心宜無不可為者若次孫之違眾獨立崎嶇險難卒以乳孤報主剪叛雪仇受知當宁與主同升迨其還里乃解帶脫冠親為除墓展拜哭泣數日而後去此其人豈以僕役氓隸為不足居耶抑真見夫循職守分理有固然苟非是固有所不快耳違觀于後而谷風棄予角弓相尤逞逞釁起至微嫌生骨肉而不可止抑何古今人之不相及耶廼今得劉氏僕事庶幾近之因作義僕傳義僕者名增華瀨水劉氏之奴產子也恒粥粥默默無所短長劉氏亦以嘗奴畜之頑癸酉歲劉仲子道開補瓊之崖州幕以遠

挈家遂偕其季并二客三僕以往海邦毒淫每多瘴癘不善攝生逞逞善病以死到未踰年二客旋斃僕人繼之仲子恐乃出橐中裝付其季以歸季歸而仲子亦殞其屢病不死者增華一人而已然其家顧未之知也一旦客自嶺南來有傳其耗者鄉里故舊往哭其廬踵趾相屬未有不噴噴廣柳莫致者而仲子之室人夢裏牽衣金微不識下椎心之泣徒使城崩咏死喪之詩誰求原隰渺然寸軀即化為石無益也而孰知萬里一身問關五櫬梯航不險山海非遙安坐而至者之竟出一目不知書窮年執役之增華也哉夫增華子然一身素無父母妻子之戀且又歸為人役有何倦倦於故都即或首丘在念而利厥所有詭稱貲盡且曰五櫬難非一人任也其疇得而禁之亦疇得而非之而顧鞠躬盡瘁九死不辭卒俾異域羈魂長辭蠻雨深閨血淚獲洒孤墳不第使仲子之室人有以謝仲子而且使仲子得藉手以報二友增華雖僕人

乎其所全於劉氏者大而得于義理者深矣向
微若人吾恐華萼同條雖氣通乎春雨羽毛共
奮徒序列于秋雲將不異杖杜之孤生而終同
鼠思之泣血也烏可同年而較哉每怪世人不
察開口詈人輒呼曰奴不知求仁得仁奴亦聖
賢昧厥本原士猶犬豕嚮使人人盡如此奴則
忠臣孝子信友悌弟何必咏篇什而永懷攷遺
編而長懷也哉友人徐國英劉甥也嘗謂余曰
增華之歸也跪主母前再拜且泣敬致治命并
出積俸百餘金封識宛然曰主所手授也是時
旁觀之侶雖謬相敦重靡不妄意其私蓄者既
而襍被蕭然衣衾不掩始交口歎服曰昔王忱
葬書生而埋金閭敞逢孤孫而致貨冰霜之操
古謂美談繇今觀之不足多也後數歲仲子有
幼弟復以病狂獒走殪死它邑增華徒步訪求
久而不得乃以貲糧告匱歸請于季季如弗聞
也者逮質衣往而聞某所有道殮土人已掩埋
之矣遂慟哭而歸予以是益知增華之為善益

油然出于至性而非末世緣
飾之士所能步武也故記之

陳翁傳

包壯行 南通州進士

陳翁名廷瑄別號守泉子溧水之柘塘人也身
長八尺餘力千有餘斤溧水糧長例以豐阜者
為之翁家貲四三千金故推擇為糧長嘗隨令
兌糧於軍縣故有一鍊斛約九十餘斤重得者
先兌先歸翁獨違違排眾得之或有爭者翁則
隻手舉而置之高檐眾卒莫能敵也又嘗以事
詣溧水同眾跪縣庭令不知其長也以為立於
眾中怒曰爾何人耶敢不跪耶翁曰某跪矣令
疑命立眎之大駭曰爾長如此耶其可作一
殿將軍虜為之嘆詫者久之嘉靖癸亥間島夷
入寇徑翁村口翁方獨立門外井傍忽遙見之
亾兵器可操祇有汲水器在繫繩輪而示武意
氣殊間暇亾思夷眾望而愕貽遂舍而不敢侵
翁之勇而有膽如此翁又嘗有事都城所至輒

數十百人擁簇以觀謹噀聲溢于市翁虞以震
驚觸網不復入金陵城郭其勇而有知又如此
翁家雖豐阜虐然不妄費而麥亦不怡而惜費
嘗值凶歲三捐穀以濟饑人其勇而有仁又如
此蓋翁儀狀誠偉岸膽力誠疆大性寔春密淑
慈故威雖足讐島夷而飭躬行憲少開臯公
府亾少構怨鄉邦且也以孝弟聿故里開至今
靡不憇稱說之翁竟以壽善終於家其子五其
孫十有六振振繩繩殆藜竹之立生而未艾云
余未及識翁識翁之孫茂林子名秉植者蓋翁
叔子悅耕公之四子也工書造造偕友東麓子
李君客吾通故余得與聿翁遺事又聞李君嘗
至翁家訪翁遺物見其舊履一尺五寸以長
異哉論曰昔宋呂文憲一鬻薪人之魁梧勇悍
者耳趙制置南仲見其一遺履長尺有咫訝而
招置帳葑浸積功而為將帥宋室深倚賴之當
翁之時曾亾若南仲者舉用使翁竟未建功豈
致名位而與文憲竝輝映簡編惜哉然有孫賢

如茂林子者敬從厥兄孝養父若母又能索言
野老表揚翁蘄傳不朽翁亦已不虛生斯世哉

國朝

兩義士傳

周之標

長洲

余昔家石頭城瀨水相去百餘里間與瀨之君
子游每稱說其邑有兩義士出於一門蓋樂川
樸菴父子也樂川幼喜讀書識大義得賢內助
曰許許亦士族執婦道惟謹樂川亦相莊如賓
舉三子治家勤勞有古黽勉匍匐之風年未三
十而卒當疾革之時執樂川手曰吾不及終事
君子命也吾有三子俱未成立逝我梁發我苟
者至惟勿使虐吾子則雖死之日猶生之年子
共勿忘樂川初亦嗚嗚泣既而收淚厲聲曰卿
言及此非吾之知己也吾肝腸寸寸裂矣今吾
年已二十七有三子自與卿為伉儷義不薄誓
不再娶遂棄去舉子業以父而兼母朝勤夕劬

家廼以殖時樸庵僅數齡耳目覩阿翁不娶每
私念曰吾父因吾母一言不忍吾兄弟為後母
所摧殘不復再圖琴瑟之好吾兄弟有不承歡
順志敦曾閔之行者非子也及娶孺人傅氏後
孝行益篤如是者二十三年值樂川五十初度
將舉觴而忽臥病樸庵皇皇如有求夜半焚香
告天願以身代遂割股和湯以進不使阿翁知
不三日而霍然起仍得舉壽筵以娛翁親朋有
知割股事者樸庵囑令勿言言則懼傷阿翁心
也肯三兄弟已析產樂川知惟仲子賢安于其
室樸庵温清以時出入必告至樂川七十八歲
忽含笑語樸庵曰吾逝矣向吾有疾爾割股以
療之茲吾未嘗疾也故非爾之所能療况吾享
上壽且及見孫而今與爾母相見于地下吾復
何憾樸庵嗚嗚膝下尚為孺子慕居喪盡哀茹
蔬枕塊且居廬者彌年里閭聞其篤孝無不敬
之慕之雖然此樸庵所為百行之原而未足以
盡樸庵也推腴產以恤猶子立祀田以享先人

嗟病涉而成深哀道殪而進食設途漿功同蔭
賜贖人婦惠免泣婺邑中如李太行輩咸稱之
不置摠之樂川先生義夫也而兼慈父樸庵先
生孝子也而兼仁人殆所云執義若執圭守身
若守節者於今廼見之矣

文

宋

趙氏諭後文

趙三捷

見隱逸

居官之法曰慎曰勤曰廉曰幹務忠于君苞苴
之路勿通奔競之途勿履尼媪母容輒入奸吏
母為所辱母殄暴損物母苛刻害民母諂諛苟
祿母闢茸辱身既能報國必能榮親勉之戒之
恪遵此訓母視右忠君上
我言以為虛文

人有五倫事親為大三綱所先眾善攸在身乃親之枝勿賤辱以敗學乃行之本毋荒淫以怠必甘旨是養必溫清以待必怡愉致敬必歡忻盡愛勿酒色是嗜勿妻子是私勿爭訟以敗家勿奢靡以喪資勿十惡以辱親勿五逆以取危有一於此是謂逆子汝其戒之天道甚邇右孝父母

凡人之行敬長為先況我伯叔尤宜恭虔毋矜已之能毋恃已之賢毋傲相加毋為事自專必洵恂致敬必雍雍加謹侍奉必致歡娛出入必操杖几一能如此和氣滿門鄉黨親戚稱賢子孫勉之勉之右敬尊長

勿易吾言手足之親分形連氣雖有他人莫如兄弟患難必同扶持家事必同幹議毋婦言是聽使天倫乖戾毋私財是營使骨肉背棄毋分門割戶使同胞分異毋爭長競短使人稱不義有一於此

大義已廢爾其 右友兄弟

戒之守此勿墜 惟我祖宗善有餘慶族黨之蕃子孫之盛鄉里罕比孰不起敬必以義是執必以禮是居必雍雍而和睦必親親而勿疎必忠勤而篤厚必勤會而時娛貧窮必相卹患難必相扶昏喪必相助榮利必共圖有能如此克 右睦宗族

光門閭凡我子孫勉諸勉諸 曰禮曰義人不可離禮以立身義以制事由禮義行君子同趨行非禮義與禽獸俱謙恭敬讓此禮之秩排難解紛亦義之適凡我 右崇禮

子孫各宜體之無禮無義爾其何為 義 婚姻之道擇婦與婿婿相配何必求異勿慕富貴而失道義勿尚奢靡而致家廢婦德既賢克事舅姑雖無金珠家道自娛婿德荷賢克興家室今雖貧賤烏知他日婦婿非屬所係不輕

勉之勉之 右謹婚姻 此道宜懲

萬物有本報本當勤豺獺尚然而况於人喪親
盡哀追遠盡孝一遵家禮朱子垂教凡我子孫
繼繼承承勿替 右慎喪祭
此語及爾雲初

或仕或耕各勤其職仕則忠君耕務足食毋游
閒以廢時毋怠肆以玩日毋荒迷酒色毋畱心
博奕有一於此家敗業 右敦本業
失勉之勉之祖訓是則

訟端不興由於能忍小忿罔加守法惟謹勿凌
忽尊長勿傲慢鄉閭勿瞞欺財利勿侵占田廬
勿以富吞貧勿以衆害孤勿酗酒使氣勿行詐
蹈虛如此由之雍容怡愉何訟之興爾其戒諸
右息爭訟

明

吊齊司馬文

李默 吏部尚書

嗚呼革除之難糜爛崩摧齊黃倡義卒坐黨魁
國事已去臣心未已倉皇出奔徵兵故里智雖
不足忠憤堪吁方諸召忽情類事殊不顯文皇
宣我周鼎顧命在天公則胡肯骨肉並殲道路
咨嗟公獨抗顏嗜死如飴朝結忠魂暮成義士
人臣事主謂必如此彼其之子河上逍遙乃矐
童髻人謀既乖天命有集犯順而誅黨禁彌急
天王聖明澤霈雷雨遺孤煢煢脫自囚虜苗裔
永存祠宮載饒典祀有常王令之德默職事匪
違深川弭節瞻拜興哀椒漿助馮維海可覆維
嶽可頽齊黃大節萬世不回

祭齊司馬文

王從善 知縣

維公絕世奇才少魁南服先帝眷倚表樹赫赫
托孤寄命丹心報國死輕鴻毛勁節不屈天子
褒嘉優禮殊渥裡祀千秋是荷百祿

祭節敏公齊司馬文

蔡夢說 史 巡按御

維公辰象毓秀嶽瀆鍾英玉泉大貝金井青萍
托孤高廟列職夏卿北平畫策青宮建明國派
載易此心不更抗烈報主仗義捐生噫瀨水可
竭中山可傾公之節槩不涸不崩夢說觀風茲
土仰止夙興薄言
奠吊式表忠精

祭節敏公齊司馬文

郭思傑 右僉都御史

嗚呼公於靖難之際豈不誠難矣哉夫文皇帝
日以天下為事而搃戈南面公獨抗節夷齊奮
不顧身無非以身為顧命之臣先帝實式靈之
欲一絲奠九鼎耳夫何竭智殫慮命將出師金
川不守復圖出奔豈人謀之不臧抑天命之自
有真不知者比公於七國之錯而公之精忠大
義烈日嚴霜又何愧于宋之祥而唐之真也
柰何一介忠臣殃懼九族所可幸者孫枝一

猶存乎六歲兒之身彼全身遠害者甘與草木
同腐朽而公完名全節真可對天地而泣鬼神
春秋專祀廟貌嚴森何如生者愧其後昆余奉
命撫治茲土誦公遺烈未嘗不灑泣而愴神嗚
呼首陽之巔瀨水之濱英風高節照耀古今疾
風勁草板蕩忠臣人誰無死所貴不湮公之死
可無憾矣敬陳詞而
薦酒神髣髴以來歆

祭節敏公齊司馬文

林道南 史 巡按御

嗚呼臣道惟艱有身匪臣自非英烈金石曷傾
靖難之役公瀝寸忱金川不守大事云定櫟槍
夜亾鼙鼓宵奔忠肝義胆唯公一人九族就戮
孤胤煢煢疇謂慷慨而非成仁繼沾郵典公論
不泯千秋血食竹帛輝映觀風茲土想慕殊
殷精忠大烈高山景行敬薦一觴以慰厥靈

諭祭贈太僕寺寺丞武暉文

嘉靖三十七年

惟靈忠義所激禦賊前驅卓立戰功竟殞鋒鏑以死勤事祀典攸宜

重修徽恩閣上梁文

陳子貞

知縣

知縣

伏願閣開顯應報赫赫之鴻休扁號徽恩標巍巍之偉績然歲久則易圯勢重則難支是以過者懼棟柱之將摧遊者嗟風雨之不蔽媿子綿謨承賈花封年登物阜實有賴於祺祥盜息民康已然司於陰騰值此徽閣之傾頽敢作蓬廬而莫顧乃捐已俸用勸民資事本順乎物情志匪荒于土木幾由神授役不踰時敢云信而後勞乃獲子來之眾庶幾悅以為使爭如父事之趨名雖舊修實則新初三朝故閣一旦而鼎新百尺層樓數旬而不振飛雲捲雨十萬家烟火盡屬此處樓臺集翠浮嵐數百里湖山俱入望中圖畫此固氣化之當遠似亦地靈之有待塔高送目覺宇宙之無窮批果上梁慶神人之有沈

伏願上梁之後助順錫禧人人樂茲巍閣回祥垂祐家家入我熙臺登于斯者脚下生春眺于斯者眼中無礙千年香火燦爛天上之星辰八面窗櫺吞吐畿中之風雨民拱北辰之德政士窺東壁之文章商賈趨天市之垣學彥進文昌之府四野妖氛挽天河之一洗千齡感壽整箕翼之重輝萬福攸同兆民永賴

檄溧水置買學田文

徐必達

照得本府自二十年前曾令溧水見諸生澤於道誼篤於文章意甚愛之敬之而深媿表率者之無能也即量移以後相勸相規有如一日益士風之厚如此不自意復叨京兆與諸生仍有提調之責則益覩諸生道誼文章日以進矣願聞斷盡畫粥盤壁囊螢者不乏誰司教牧寔編耻之今該本府節省公費約得銀三百餘兩合行發買學田以贍貧士為此仰縣官吏即將發

到制錢三十五萬三千查收明白即會同本縣
師生務揀擇附郭腴田查照時價兩平置買召
募忠實佃戶佃種又記得令縣時亦曾置有學
田亦即一併查明歸併通年租穀即葺理高爽
倉廩一間上置周士倉扁一面將稻收入其中
每于冬月該縣學掌印官親訪貧士姓名批給
貧而文行兼修者為上能修而行而文或不逮者
次之給發之日須本生親詣赴領不許轉展他
手致生弊端仍置本府學租簿通年送府查驗
先將買得田地畝數四至賣主姓名契及租
穀數目佃戶姓名
刻期報府施行

劄

宋

禁三湖開河劄 乾道元年二月

張維左朝散郎

竊謂堯之時洪水泛濫而三江不入於海其勢
必乘虛而橫流今之五堰河正其虛處也以去
年之水高四尺而漫過分水堰堯之水橫流
而過此地當不止四尺切意開鑿此河而設
者蓋自於此耳以是觀之古後世決不復
為五堰者其慮遠矣夫堯與浙均有雨
有也如去年之水間亦有蓋蘇常水盛則
水則固城湖雖漲亦不能奔蓋蘇常水盛則
外水自不能入如去年之水是也惟是蘇常
雨水而上江兩獨多當此之時大江泛濫壅
湖流則其勢必奔五堰而蘇常始受其害矣
竊籌度若開此河委非輕久利便乞從朝廷詳
酌而行

敘

唐

送劉太真詩序

出唐文粹

蕭穎士

記有之尊道成德嚴師其難哉故在三之禮極
 乎君親而師也參焉無犯與隱義斯貫矣孔聖
 稱顏子有視余猶父歎其至歟今吾於太真也
 然乎爾且後進而余師者自賈豈慮翼之後比
 歲舉進士登科名與實皆相望騰遷凡十數子
 其他自京畿太學踰于淮泗行束脩已上而未
 及門者亦云倍之余弗敏局云當乎而莫之讓
 益有來學微往教蒙匪余求若之何其拒哉噫
 爾之所以求我之所以所以誨學乎文乎學也者非
 云徵辯說據文字以扇夫談端驟厥詞意其于
 識也必鄙而近矣所務乎憲章典法膏腴德義
 而已文也者非云尚形似牽比類以局夫儷偶
 放於奇靡具於言也必淺而乖矣所務乎激揚
 雅訓彰宣事實而已衆之言文學者或不然於
 戲彼以我為僻爾以我為正同聲相求爾後我
 先安得而不問哉問而教教而從從而達欲

師也得乎孔門四科吾是以竊其一矣然其德
 行政事非學不言言而無文行之不遠豈相異
 哉四者一夫正而已矣故曰詩三百一言以蔽
 之曰思無邪不正之謂也吾嘗謂門弟子有尹
 徵之學劉太真之文首其選焉今茲春連茹甲
 乙淑問休闢為時之冠決旬有詔俾微典校秘
 書且馳傳壘首領元戎書記之事四牡駢駢薄
 言旂歸聲動宇下決于寰外而太真元昆前已
 甲科太冲間歲翩其連舉謂予不信豈其然乎
 夏五月迴棹京洛告歸江表姑兮此歡既萃
 矣兄矣弟矣榮斯繼矣縉紳之徒習禮聞詩者
 僉曰劉氏二子可謂立乎身光乎親蹈極致於
 人倫者矣上京餞別庭闈望歸從古以來未之
 聞也余羈宦此都邑斯云舉彼吳之丘曾是昔
 遊心乎往矣有懷伊阻行矣風帆載飛載揚爾
 思不及黯然而泣先歸孝悌謹信泛愛親作余
 力學文之訓爾其志之南條北固朱方舊壘昔
 與太真初會于茲余之門人有柳并者前是一

歲亦嘗觀其地其請業也必始乎此焉并也有
尹之敏劉之工其少且疾故莫之逮太真亦嘗
日何敢望并并與真難乎其相奪也緬彼江陰
京阜是臨言念二子從予於此爾云過之其可
忘諸同是餞者賦江有歸舟以寵夫嘉慶焉爾
詩曰江有歸舟亦亂其流之子言旋嘉名孔脩
揚于王庭允焯其休舟既歸止人亦榮止兄矣
弟矣孝斯踐矣稱觴宴喜于帖于此彼逝惟帆
匪風不揚有彬伊文匪學
不彰予其懷而勉爾不忘

送劉太冲敘

斷碑存學宮

顏真卿魯罷國

城之華望者也自開府垂明於宋室澤州考績
於國朝道素相承世傳儒雅尚矣夫其果行修
潔斯文彪蔚鄂不昭乎移華龍驥乎雲路則
公山正禮策高足於前冲與太真嗣家聲於後
有日矣昔余作郡平原拒胡羯而清與從事掌
銓吏部第甲乙而超升等第爾來蹉跎舊歷



居顏魯公帖按香木迺送劉太冲敘也併及

位雖才不偶命而德其無鄰故冲之西遊斯有
望矣江月弦魄秦淮預潮君行句溪正及春水
最茂之子道在何
其仲氏太真新舊唐史文藝有太真傳不記
其與伯氏繼登天寶上第文集三十卷見館
閣書目墓在縣北號柘塘神市人月日祭禱
必應深陽人尤神之神道碑裴度撰蔣潼書
昔曾易置丞廨旋轉縣齋援到官初得之縣
庖下僅存三百七十有九宗同郡李兼經後
相與起敬鄉賢出其家藏顏帖再摹入石并
斷碑匣置廳壁敘言彭城華望以劉於此邑
為著封姓纂云宣城凍畱是也開府澤州公
山正禮表其先世也平原從事銓部甲乙顏
常汲引冲也蹉跎卑位悼其窮也句溪春水
此邑時屬宛陵也鄭薰北望樓記言元載貶
顏夷陵別駕後遷廬陵刺史道出莆塘有左

伯桃詩第序腦凶太冲彭三字考汝越帖亦
然莫可補闕慶元巳未上巳宣城戴援跋

溧水縣誌序

嘉靖四年

范祺邑人

嘉靖四年春三月襄陽王侯來視溧水事下車
之初除弊政新化理民即安之及是喟然歎曰
偏州下邑且有志溧水密邇南畿為首善之地
我皇明奄有海內百五十年來嘗脩於餘千陳
君憲今又淵畧矣非司民牧者之責乎即屬之
學博方君彥邑士夫黃公志達輩相與檢閱讎
校而筆削之惟謹志成將壽之梓侯不予鄙俾
序諸首予雖老且拙何敢以不文辭夫輿地有
志尚矣粵稽諸古黃帝畫埜分州大禹任土作
貢職方掌於太司馬小戴記王制之詳皆帝王
政務攸寓而太史氏之所重也姬轍不西降為
春秋戰國諸侯方務去其籍而帝王經世之大
經大法隱矣繼是而馬班執筆始有志有紀有
傳有表後世因之有今邑志之作蓋亦史氏記

事之體爾視郡志當加詳焉予次第觀之其山
川人物風俗城郭公署學校選舉戶口貢賦與
夫老釋之廬鳥獸草木之名文人墨客之所著
述有裨於治道者無乎不志詳而不泛正而不
迂事核而理明足以信今而傳後是謂之志固
非藻餘附會以崇虛文應故事而已也嗚呼續
百年之曠典足以崇虛文應故事而已也嗚呼續
攷究而推行者有所據豈不快哉

重修溧水縣志後序

黃志達

古史廢於秦而志興焉志乃史之流裔豈直稽
建置沿革之由山川形勝之跡之類斯已乎要
之綜名實垂鑒戒有感人心挽世運者存是故
識治體者先之溧志故本雖再釐於編集間或
未詳於攷訂襄陽王公以碩德宏猷視予邑事
搜遺舉隆罔不究心願本邑之志未詳乃酌與
論容儒紳芟繁剔疑補闕闡幽分列若于卷繡
梓以永其傳誠一邑之冷典也噫昭聖代輿圖

之盛啓將來感會之機此則賢侯文教之功之
不可誣者予慚衰朽濫竽纂惟之未跋此以識
歲月
云

溧水縣志序

萬曆七年

吳仕詮

知縣

余居嘗睹昔人聚米畫形借箸陳狀津津焉譚
往事不啻指掌豈一一賦職而拇趾之哉蓋按
籍可以論世據程可以鏡往此鏤心揚摧者攷
攷然唯誌之討也余治賴踰四稔其於山川賦
役人物風俗知之稍悉輒欲蒐輯成誌為此邦
文獻作不朽計邦人語余曰賴故有誌兩矣其
一蓋初於餘于陳公憲其一則襄陽王公從善
所纂修也余亟取讀之兩者舉無足術焉何所
病之病其以簡而漏以詳而複以誇而廣也姑
無論兩志即自襄陽公詎今所又冉冉五十餘
禊其間沿革消長隆污至不可勝紀必欲株守
前志諄之諄矣於是壹意誌事東嚮而揖黃山

人汝金因以藁屬焉山人固此中耆宿諸於掌
故者也山人曰誌易言哉自遷固任陸以還誌
輿地者無慮數十家隻詞少鑿君子猶敝帚
之乃金何人斯敢以蚊負耶余謂山人曰不
慮簿書弗給以故次得分任於君君職其詳余
職其要惡乎不可且也千金之裘不成於一狐
之腋君無讓矣山人唯唯退而屏居蕭寺中博
集群書肆力參訂歷數月草乃具余復為之拾
其遺汰其冗釐其譌間以評品附焉凡浹歲而
後報成事即不敢妄意有加於前顧漏也複也
厲也或庶幾哉免夫誌既成復進山人與語曰
君知郡邑有誌即國有史乎史以備一代章瘳
誌以備一邑勸懲為功均也茲誌一出後之宦
於斯生於斯者披卷而悟懼然而奮指某為仕
也賢吾將肖之指某為鄉也賢吾將肖之嗣是
禪治理表風教以景行無窮斯誌實為之嚆矢
矣如徒以文爾也語云玉卮無當即美弗寶觀
者亦且敝帚棄之而竟何足術焉山人又唯唯

是刻也余業已請邑人僉憲武公之言弁諸首而復贅數言於次簡云

溧水縣志敘

萬曆七年

武尚耕

邑人戶科給事

余邑故有志自嘉靖乙酉迄于今闕而弗脩踰五十年所其間政體民風物力人文氣運之變月異歲增當入之掌故者何限他勿論即余有識以來所覩記如建城垣遷巒序如平稅履畝條差諸法又如巨水浸城旱蝗沔被倭寇釋騷諸災警之類關乎一邑最鉅且夥勝書乎弗勝也顧遠不過傳之父老近備習之牒檄要束已耳安所收而輯之舊蒞吾土者亟欲考政問俗而措之理輒稱闕畧無稽捩腕有餘憾焉嗟因仍久之將不淪佚殆盡乎此豈直邑政之缺邑之生今學禮者咸病之矧異日又何以備太史采錄哉邑侯湧瀾吳君奉上拔來試吾溧既下車精神計慮罔不在閭閻疾苦三載刑清蠹剔士勸民乂蓋久任樹立者章章矣當六事暇

慨然有意于斯爰聘山人黃汝金氏搜羅故實續而成帙潤色屬之邑博高君輩乃君侯親為裁正焉將登梓則走札盱江分署委余敘余唯君侯所重在志不在余詞章文不文也安敢逆遠命竊謂郡邑有志方諸古列國史無二輓近類有作者體裁人人殊總之不離平核實傳信足垂不朽者為當國朝有一統志諸藩有總志通志乃郡志之外屬邑每自志之各成一言相軋而爭雄豈不以省郡第挈其大者纖細曲折櫟括不遺宜莫詳于邑邑之志可少缺耶應天舊有金陵志大司徒少泉汪公尹京兆苦其弗備檄徵諸邑遺亾重葺之為府志君侯因念邑志綱領在是也溧之志殘缺幾廢矧茲綱領振矣一舉而新之何難又念不習為吏問已成事志固官方寓焉不續則軌鑑安在受直之謂何是以續之不容後也君侯之識曠達深遠已哉余得其所謂原志而數四誦之大都弗尚張大筆削唯詳事類弗徧敘從簡也分野弗槩

述闕疑也置形勝食貨勿次雜支蔓也弗輕議
官師藏否褒貶慎也孝烈雖幽潛必載教化崇
也夫筆削詳吾知其體必嚴不尚張大吾知其
事必核將來勸懲可無爽而考索為有徵傳信
方永賴焉又何淪佚之足患即未及捧全書而
披覽之我君侯良史之才余竊從此窺一斑矣
嗟嗟二百餘年之往蹟一旦績而新之燦然存
諸方策俾後之考政學禮者欲定古今綜名實
無鉅細隱顯咸在目前吾不知伊誰之力舉一
邑將墜之曠典成諸賢侯未竟之美意其在斯
乎其在斯乎是為序

溧水城隍白府真君事畧序

王守素 光祿寺 邑人

余枕塊卧里中二二父老時過而慰藉間出一
編授余曰此重刻城隍神白府君事畧願公弁
以一言問事畧所以重刊者何則以徽恩閣重
新故問閣所以重新者何諸父老虔請而邑大

夫主之余謂是閣巍然在廟之中央高十丈許
廣闊半焉撤而新之為費何翊千金父老乃數
其費所自出又具以經始落成日月告余曰有
是哉大夫可謂識政體矣政亦多術敬神保民
其大較云而先後辨于其間矣大夫奉命蒞吾
邑未及下車已知白府君聰明正直而壹者也
寔能庇祐吾民謁故廟中頌額閣殊不稱神
德輒思所以新之獨念聖上先成其民而後致
力於神時詘舉靈神焉用享未信而勞民謂我
何居三年而政居人和歲比登黎庶欣欣有德
上心大夫不自有其功悉舉而歸諸神父老緣
大夫意請新閣以報神大夫曰時可矣遂捐俸
為寮屬倡鳩工聚財度日興事士民間大夫有
盛舉皆往助貢金輸粟來若川流而二二父老
實經紀之用不煩官府民不廢時務甫越月而
告竣規制視舊加壯麗矣噫嘻大夫得政體正
上下一心神人胥慶也固宜或者曰事神者吾
聞明德以薦馨香不聞其以土木之崇高形饒

閣奚急焉余曰否否古君子之為政也望雲物
察災祥誰得去臺人誠有之神亦宜然白府君
於水火虫蝗之屬類能為之備疑于是閣焉有
賴大夫務此益推人以同於神思深哉夫民神
之主也大夫勤民至矣印新廟貌虔禱祀亦無
一念不在民者神鑒明德而薦降之嘉生固世
世血食大夫亦且有餘休矣白府君事略載在
簡冊人人能言之故不具述述閣所以重新者
若此父老謂余言果當于斯舉遂書以授
之大夫者誰豫章陳以成為余同年友云

風朝

重刻白府君廟誌序

順治十年

閔派魯

知縣大

聞之懿德嶙峋歷久絢炳如峴首墮淚庚桑畏
壘其人不朽其事不磨越千百禩而與誦儻朗
媿蹟輝昭若雲漢含星而光耀洪流永永不替
也溲之白府君惠露沃濡仁風蕩播尸祝

傳之口碑載之邑譜亦詳且悉矣乃復有廟誌
一書輯其傳志碑銘并系代之羅錫褒封後人
之詩章賦詠與夫尊修諸文疏詞記彙列成帙
集為一編以是知府君之澤闕無疆溥人之慕
義罔敷詩云民之秉彝好是懿德職此志矣第
茂久編殘劖剔散落不免有細缺洽之憾其
先承嘉陳公領牧茲土肯構廟功欲輯廟誌而
新之會人事外于厥緒未就耆民湯學尚年躋
大耋賁志不衰非祇願養敦懋飯禮竺乾而肅
恭明神尤夙拳拳塵諸臆遂捐資購贖原板如
密人之思卓穎川之慕韓弗翊也檢校藏板如
缺其三原錢書法亦漫漶聯糊非更壽之梓不
可學尚忤衷章皇從容晉言曰明府蒞治喻其
弊釐政舉即今府君廟模竦煥殿閣燦然鼎建
勅樓廡宇壇整神之佑啓乎實明府之鼎力贊
董勸相鼓舞以臻厥成也而廟誌闕然一任殘
剝無乃非明府意乎余曰修廢缺章令與攷前
文邑宰事也余何庸辭矧神祠新飭余業分俸

鑑助鳩工誤文以記迺事今尊廟志寧敢唐捐
于是取府君廟志原本公餘之候反覆諦閱因
校訂纂修之缺者使補訛者使正即命耆民學
尚董其成俾刊鏤維新垂諸無朽并捐清俸為
鏤木資濡躡頒布不敢恡錙銖湮晦明德蓋一
以表著神休一以彰明舊典一以志深民慕義
之誠既勵後之蒞
茲上者行自勉也

樓桑館詩序

閔派修

署之西軒昔月沙張公所構也卉木之盛足以
表時序適退思歷年久遠蕩為榛蕪余始至是
惟一軒巋然此外無容膝處拊月沙之故碣悵
烟艸于荒除何掾孤梅已摧東閣晏公雙柳靡
識殘柯俛仰今昔不勝慨然既而瞻彼短垣一
桑甚古幢幢竦立高幹拂雲繁蔭結陰其下修
廣度可置三楹適工有餘材遂因農隙而董治
之東其戶引朝曦也南其牖依美蔭也素壁疎

櫺不雕不飭何敢擬画舫于永叔比寶晉于元
章欲以坐怡清燕斯焉足矣然余之迂拙未能
即安于此亦用勤婦除以俟賓客之過從耳故
額之曰樓桑館工既畢與客燕飲以落之以各
為詩一章
而賦其事
引

明

新修溧水縣志小引

萬曆七年

黃汝金

邑山人

溧水故無志國朝正德已巳餘干陳侯憲來祝
邑事曰邑無志國無史也往蹟奚稽乃索于掌
故氏得抄本前坊郭野史殘斷無次者略為裒
益邑人范臬僉公實董其成越十有六年為嘉
靖乙酉襄陽王侯從善來視邑事曰有志而畧
猶無也乃采訪遺事擇諸生中飽于聞見者為

之纂緝而侯手加校讐焉視前志稍加詳矣嗣後寥濶五十餘年歸安吳侯仕詮來蒞吾邑萬曆丙子大京兆汪公重修金陵志檄侯撫拾邑中遺佚以報侯命山人汝金討論之諸博士弟子因以志請侯曰未也余視事日淺民心未同安敢議此越二年戊寅侯約已裕民百度咸舉諸弟子復以志請侯始折東報汝金曰邑務稍暇欲與子議志事汝金以寡昧辭侯曰志貴核耳非徒以文也顧子髯眉且白庶幾乎邑之宿儒哉舍子奚屬汝金始敢諾凡所纂緝一本于正嘉兩志金陵新志及鄰郡邑諸志吾溧曾屬隸焉者悉取參閱焉或此詳而彼略則互證之或彼有而此闕則摘入之五易朔而始呈草于侯侯從簿書之隙斤斤焉殫思釐正力追古雅踰年而志始就汝金誠無知然竊謂文直事核稽肆闡幽則它邑志或不及也初汝金具草時客有索觀而譏其陋者汝金曰子未知築室之道乎工師之為巨室豈木木而親斲哉必使人先為之樸若命負之美工師事也吾所示者朴焉耳吾猶有工師在焉客笑而退志入梓且竣事聊附數語于末簡

溧水城隍白府真君事畧引

陳子貞

知縣南

自余始宰溧也惴惴焉以民事為憂客有告余者曰水不停宿火不延二煌不入境此白府真君自誓之詞而溧民永受其賜者宰斯邑也夫何憂焉余聞而識之未以語人也壬午孟夏十有八日邑民以真君誕辰循故事舉慶會因上徽恩層樓見其棟宇傾圮即思所以新之時虞財力告訕修舉未遑越三載而舊貫不可仍矣因嘆曰此神明靈氣之鍾一方游觀之勝也可視其廢墜而弗之葺乎遂謀之僚屬共捐俸為經始計由是士大夫之賢者助其成父老之尚義者勤其事不勞民不傷財不逾時而匠氏呈能繪人獻采巍然煥然樓閣之大觀一新矣是知

神以福澤庇其民故民以子來報于神不然胡
能使人心踴躍一至于此耶既而舉酒相屬父
老復出真君事畧古刻一帙欲付之梓因閱及
神誓之詞乃知容之告余者匪誕也自肇祀以
來不聞水火虫蝗之災乃知神之自誓者匪虛
也是宜復梓以修其盛美云今而後神其益顯
厥靈永為民庇豈直廟食之
光抑無厯有司憂民之慮
記

唐

聖母廟記

昇元六年

韋貞詎

秘書省校書郎

有唐中興文軌未一天子宵旰惠于烝人壽茲
賢才以理郡邑詔瑯琊王公出宰畿甸公每鄙
衆心尚崇淫祀不有取舍那分否臧爰采地置
稽之故事古之諸侯今之令長得祀境內以祈
有年有若聖母享于是山其名中山其神后土
將設廟貌胡為不然其餘囂浮所完上木之記
並從毀折無或興妖有以見公之去邪
蔑疑焉為政以德愷悌君子其在茲乎

宋

鼓樓記

劉宰

謚文

紹定庚寅溧水縣鼓樓成樓之屋五崇五十有
二尺廣加二十有八深減二十有地經始於歲
而風雨不侵翼以兩廡而登降有地百萬有奇
之首訖工於九月既望費以錢計八百萬有奇
鼓以頌政令而觀聽聿新鼓以錢計八百萬有奇
有節又棟宇之高明丹堊之炳煥使人望之
慢易之心消敬畏之心起蓋不俟單辭之陳
造之備而不言之教不令之威已行民咸曰休
哉其年冬大夫具為書介邑之士江君遂良來
求余文以記余惟大夫當世文人余辭鄙不足

進則請屬能者明年秋遂良復以大夫書來曰
代更有期又閱月行矣子其無辭余惟溧水自
隋開皇置邑中間遷徙不特斷自我宋開寶以
下亦已垂三百年矣而是樓不作謂邑之匱而
不給于力歟則圃環其後堂時其偏昔固有
其餘力者矣謂事之殷而執事之不間歟則從
容觴咏流入筦絃昔固有心無二用故用之於
樓不作何也人惟一心無二用故用之於公
則公家之事雖耳目所不接知無不為用之於
私則所急者燕閒之適耳遊觀之娛耳於是樓
何有哉且余於大夫無一日雅而聞其在太學
也寧逡巡退處不敢以藝成而與眾偕升其在
選調也寧恪循考任不敢援他比而躐等希進
捨近甸而為此來其志蓋有足尚者故其來也
明足以察而不敢欺勤足以率而下不怠廉足
以律人而下不敢容其私銖積寸累以至於
問木之自則市之官與旁縣而民不知問竹
瓦甃與他物之自則市之民各以其直而民

病問財用之自則取之積累之贏如前所云而
民不擾則君之為與今之從政者大有逕庭矣
宜乎其為人不能為而使數百年之墜典
始於今也昔孔子之作春秋常事不書始事
書之邑之事孰大於是樓者書其始以示方
合於春秋之法余故不復牢辭先是邑之正堂
將覆君至未幾即撤而新之嘗白為文以記
不書若夫清霜戒曉爽氣澄秋樓迥天高一
千里憑欄西望弔吳楚之爭游日左施感羊左
之義僧居駭先聖之遺蹟儒壇想逸士之餘風
必有能援筆而賦者余以謂大夫之作是樓也
惟以備男邦之制非以為燕息遊觀之地故不
敢效尤然得以翫馘之文綴名勒石與是
樓俱傳顧不榮歟遂良曰然則書以昇

尉治雙玉亭記

劉宰

溧水為金陵壯縣而地偏無卓絕奇偉之觀故
勝踐之可尋者亦少尉治舊有二李亭按之往

志李公擇之父東嘗尉茲邑携公擇與其兄野夫來讀書於此公擇名常與孫莘老齊名言論不阿為世名臣事其國史其歸也讀書廬山五老峰下既貴儲其書遺後人名曰李氏山房記其東坡集野夫名莘仕至江西轉運副使雖仕不大顯而東坡送公擇詩云念我野夫兄知名三十秋又過公擇舊居詩云何人修水上種此一雙玉則其賢亦可槩見今亭更他名來者莫考顧縣圃隔浦淶池等處皆故令周邦彥美成游治之地世方郵其詞附益其說幸而至其地則趨走焉廻旋焉視圖之一草一本皆是寄遐想今尉尤公季端非之以為李公擇今雖已遠然訂以所聞非直前多聞古之益友歟若邦彥異是今人取友猶致辨于損益之間寧有尚友古人而不知所擇歟因復亭舊名而謂之以記余惟履墟墓而哀入社稷宗廟而敬所遇變於外所感易于中蓋人之常情則游于隔圃淶池之間而能端此念者鮮矣然則季端之復是亭也豈直尚友古人而已歟孟子曰我亦欲正人心季端有焉故余為記且取坡語定其名曰雙玉亭季端名端蓋錫山遂初先生尚書公之孫其家學有自云

重修正顯廟記

乾道元年十一月

王端朝 提舉

深水東門之側有廟曰正顯蓋城隍神白府君祠也君諱季康唐元和間人為官清白通濟凡作四縣令而終於深水雖歸葬下邳然深民尸而祝之數百年不怠即縣治為祠水旱疾癘必禱焉五代亂離未有封爵皇宋天子省方東南慶望京師餘千里亦不暇上聞天子省方東南慶幸建康光曜所昭百里而近神之受職厥有顯報紹興十年故戶部侍郎李公朝正憲宰深水有祈必獲隲于朝錫廟額曰正顯始以顯功實命帝尊後進封廣惠侯額曰正顯始以顯功實既嘉享民皆具儀桑蠶不蠲歲得大稔寡有養好尤減息民德之益深幸以清君名其子邑

人錢勇朱林等以廟宇朽敝，補走大家，傍及喜捨，寸積銖累，日漸月溢，增新廣舊，不固不壞。外門三楹，中門如之，正殿三楹，後寢亦如之。挾以副宇，繚以周廊，獻殿處中，露臺高峙，丹青繪事，輿衛悉備，炳煥光采，標冠一時。鼓屋五十間，歲四月十有八日，邑人記侯誕節，競為侯壽。鏡歌鼓吹，旌纛節斧，森乎其前，驅僮釋戒，儀倡優技巧，駢然而次，進侯臨之，如生邑人榮之，竊嘗以謂幽顯一途，神人同道，生而廉正，歿則必傳。否亦為神，積功儲行，列于上清，如府君是已。於少傅樂天為任，其家法可知也。以丞相敏中為子，其義方可知也。丞相出入將相，垂三十年，府君在當時，已贈至極品，而史不書，端朝浮家而來，卜築涇源，起居飲食，皆神之芘。邑人以紀事見屬夫，其可辭詞曰：於惟府君，唐之良吏，有德於民，宜百世祀。傳於廟貌，在城之東，萬石之虛，千柱之宮，羽衛森嚴，丹青顯設，緹衣鸞冕，手成金節，侯之泣止，風雲肅然，顧我涇民，挾

盡侯既醉，止氣斯太和，年豐俗樂，民飽而歌。侯既歸，止里閭咸仰尸而祝之，家有遺像，少傅之叔丞相之父，中興天子典冊，斯舉在唐。有聞在宋，有光佑我，涇民千載無疆。

十榜傳家記

俞 崇 米 元

俞遵字良弼，以詩登天聖宋郊榜進士官武昌軍節度推官，試秘書省校書郎。俞達字良佐，以易登天禧王整榜進士官至廣西叅政。俞城字汝佩，以書登馮京榜進士官授廣州府連州知州。俞珏字汝璧，以書登馮京榜進士官授河南府知府，爵贈兵部尚書。子卓，俞仲翁以書登張衡榜進士官授兵部尚書。子卓，俞登許將榜進士官。俞子逢，俞徽字恒若，以書登許將榜進士官。任南陽府鄧州內鄉縣尹。俞卓字祗若，以詩登熙寧九年狀元，屢陞至述古殿大學士兵部尚書。俞逢字曠，迎以詩登張蹈榜進士官至翰林侍讀。俞宣字附布，以詩登畢漸榜進士官。

授刑部主事 俞喬字自升以書登何渙榜進士授監察御史

插竹亭記

周邦彥 知縣

皇祐三年俞君美於其舍植華以斷篠扶立之
 既而花起篠茂掘之得根苞焉移植先隴又移
 於園中皆活後數年大者悉中榦梢凡根株惟
 竹為難遷遷必以良日并寘故土隨所向背旁
 設倚據以防傾連猶或不生而俞氏之篠初離
 燔燎斬取其半僑刺土中決無可生之理遂能
 滋植蓋亦異矣俞氏世宦富為鄉閭之望居中
 山俞姓者莫非其族獨君美好禮而壽有子孫
 就學能世其家其世祀始未乏也詩不云乎如
 竹苞矣如松茂矣物之堅久晚茂能閱眾朽草
 過于此而竹能無根而苞其祥又可知矣紹聖
 三年作插竹亭余為題其榜又記其異冀勉
 焉子孫

驅蝗記

咸淳六年九月

張壽 邑進士

歲在庚午隣邑上元江寧句容溧陽飛蝗蔽天
 平地盈尺自春徂夏彼之民日事驅撲于壟畝
 吾邑之內一蝗不入田夫野老相與喑喑而告
 語曰是皆吾邑城隍神之功也自神之食吾邑
 雨暘時若菑害不生而吾邑卒為樂土神之功
 其可忘耶予有恒產在溧水句容二境歲藉是
 以為食方其飛蝗四起戕賊禾稼凡在句容者
 悉罹其害其在溧水者生意勃如夫以吾邑距
 句容僅跬步耳而此疆彼界利害殊絕信乎神
 之眷於吾邑也昔漢魯恭之令吾邑也為政
 飛蝗為之避境維神之令吾邑也為政不在魯
 恭下其歿也邑民尸而祝之凡水旱癘疫必致
 禱焉禱則必應今神能陰禦飛蝗使不入境方
 之魯恭蓋死生一輒者也嗟夫遇旱則桔槔為
 有功遇夜則燭火為有功膏澤浸潤桔槔不施
 人不知雨露之功大明當天燭火自息人不知

日月之功以安居樂歲耕食斲飲人不知神之
功一有災患而後知神之為有功也功而不
書是隱神之賜也其可乎謹書神之功命工錢
梓彰于廟庭以永其傳庶幾千載而下知神之
功報事
毋怠云

顯應閣記

成淳戊辰

周成之

知縣

咸淳二年余叨恩來試茲邑是歲之夏霪雨連
月漲潦為沴縣官徧走群祀無虛日而未應也
余乃袖香扣顯德公之祠躬致懺下幾陰氣條
解晴曦在天策邊犢外始有生意既而彌月不
雨民又以為憂余復欵謁徼惠是以歲仍大和
乃止槁者與秀者實迄用康年爾是歲仍大和
五穀胥熟邑人感神之貺相與捐力度材即廟
之東徧因崇岡創傑閣數月而後訖工美哉
負斯翼斯飛士民造吾而請曰白君昔為邑長
於斯歿而廟食茲土自唐至今餘數百載我民

凡有求必禱焉禱之未嘗不吾應是以事之
恐其不至也今祠宇亦既孔曼且碩顧隙
尚可營創於是為閣三間以為出遊來歸之所
扁之曰顯應閣所以表章神之靈也願得一
紀其事去其無辭於戲神以丞相敏中為之子
以太傅香山為之姪生能澤其民死能福之久
而弗墜以有封爵若舊記實錄之所稱述與夫
累朝誥詞之所褒嘉者可攷而知民之於神
蒿悽愴以極其思茲丹蕉黃以致其敬猶以為
未足也乃建是閣揭是扁庸後觀可謂無怠
於報事而欽于世世者矣抑余因思始至之歲
為民禱晴而晴禱雨而雨其應捷於影響非
明正直闔闢造化能如是乎然則神之應應之
顯益可類推是名也信有以稱其實矣遂書以
遺邑人俾

刻之石

華勝寺記

嘉定四年

陳振孫

教諭

嘉定初余為吏深水南出縣門三里右寺曰華
 勝間送迎賓客至其所庄據南山環列如屏障北
 為旁出其南則園如馬鞍諸山環列如屏障北
 眺縣郭市井屋木歷歷可數丈室後禪松成林
 葱翠茂悅由左而下隙地十餘畝與向之諸山
 竹半圃其前稍空曠誅茅為亭與向之諸山
 賓揖余樂其境幽勝每至輒衰回不能去顧寺
 猶草創殊弗稱其境幽勝每至輒衰回不能去
 十楹而已主僧宗應方聚材於庭為與造計
 因扣以建置本末應言寺本在邑西佛子墩
 廢當紹興十七年吳興僧如日駐錫此地得古
 井焉浚之以飲行旅縣民倪實為卓菴其築至
 乾道五年始請于郡得寺之故名揚之百餘年
 十餘年其徒嗣之者志常老以屬宗應中
 興迄今六十餘矣邑無富商大賈其民力農
 嗇施無深林壽木作室者常取材他郡寺無
 產丐食足日歛其餘錄錄賣之綿歲月遷年
 一事故祖孫三世所就僅此全將為門

庶即庶為輪藏所未暇者佛廬鐘閣後最大
 未易疆勉以吾三世六十餘年所不能為之事
 而欲以一身數年之力為之哉姑盡吾力以為
 前所欲為者幸而有成則與求文刻石為記其
 已成者以期其未成者方將有請于君而未敢
 也歲薦饑弗果役三年余去官歸其冬應以
 書來曰役且畢矣同所言者今無不酬石具而
 未平文敢以請書再至請益勤余不獲辭釋氏
 行乎中土千餘歲余生長浙右見其徒皆赤手
 興大役捐金輸贖聞者爭勸其規制奢廣飛檐
 傑棟金碧晃耀往往談笑而或之視應所為若
 不足乎紀顧民俗有富貧緣法有深淺以彼其
 易以此其難所遭者固殊焉要之釋氏之教以
 空攝有所謂華嚴樓閣克徧十方毗耶室中容
 納廣座回觀世間諸所有相皆是虛妄尚復區
 區較計於規摹之廣狹功力之難易哉均之以
 有為法作佛事而其艱勤積累苦行勞力視夫
 因順乘便持福禍之說以聳動世俗而為媮食

安坐之資者猶愈也故樂為之書素之

廣嚴寺記

紹定收元二月

祖大武 縣丞

予以寶慶三年春來丞古溧其秋奉檄視溧凡閱兼旬奔走壘壘歷覽山川之勝以為金陵從昔號一都會事跡最繁重宮刹祠廟屋壁間必有碑碣可以攷古校訪多闕惟一觀中有武后時小碑及一二偽唐時碑則亦已再刊而非始初真蹟乃三國六朝以來攷攷多虞高岸深谷遷徙靡定碑石之不傳也固宜最後入崇賢鄉廣嚴寺三門之外有龜趺存焉僧會廸者謂予舊有碑記登載寺事經李成兵火斷裂毀棄僅留此耳誠寺之缺典也賢倘能念遺迹之未泯振絕響於已墜復為紀述以續前記則願能也山之石摹寫鑱刻而置諸其上亦寺之珍也敢以為請予雖不敏然每於古今治亂未嘗不為之感歎而有不容已於言者謹

志是寺本名儀成實唐昭宗天復二年僧師玘之所建是時王室衰微中原倭擾楊行密據有江淮之地乃能招集流亾勸課農業境內稱為殷富此寺所由立也皇宋受命削平僭偽洗滌汗染凡天下僧刹皆易新名至治平三年改賜今額或者記文之立當在此時至建炎間李成以巨盜寇掠江左蹂踐殆遍其兇徒嘗屯聚於寺南之二十里今父老能言其處焚蕩之及勢所必然碑記之廢於是時明矣勇夫立石紀事所以詔將來垂久遠也時改事變存亾異焉緇之倫棄去弗顧然所以於清淨寂滅而君臣父子持誦之業而適其起居飲食之便者吾儒之功

云敘

小學記

王遂 金壇人

古者家有塾黨有庠術有序國有學蓋自五家
 之上立之塾迎仕之已者為之師匪直郡邑有
 養也自能言莫不有教十年出就外傳學書記
 幼儀誦詩舞象勺十五入大學而教以窮理正
 心修己治人之道自秦罷學賤士漢唐之君豈
 無有志者更我仁祖而郡有學宮中興已後縣
 令亦稍增置然四民雜處非復家習人誦入不
 知奉親敬長之道出不聞從師取友之訓灑掃
 必無加帚拘袂之儀應對必無負劒辟呬之容
 進退必無徐行後長之序居無禮行無樂無五
 御五射之文無六書九數之法父詔其子兄語
 其弟不過聲病得失之習利祿進取之計不但
 失其學而廢其教不但學者無人而師資亦闕
 氣習日陋志慮轉薄猶之築室而無其址官

于夏區別之言子游以為未管氏弟子之職內
 政而外莫之能行卓然自立特其生質之良而
 以溲水居昇宜間當士教衰男子不背死於朋
 友女子不爽信于君臣則天倫之美宜無不盡
 于載之問風流篤厚人物表表夫豈無之而時
 王立制科舉取士千室無能應令者豈生材薄
 於古歟寶玉不琢拱把無養故也史公提刑彌
 鞏為令注意教養久漸廢壞今令王公下車興
 崇惟謹首闢西廡建為小學旋即學西關地為
 宮合於虞岸在西郊之制成童而下聚而教之
 詩賦屬對隨力所進課試有程教導有師表勸
 有式弦誦相屬先是公廩五百斛不足贍生徒
 至是歲輟諸倉月取諸稅猶懼不給會永寧鄉
 新築之圩租入七十石可以舉小學之功因屬
 遂記之遂曰小學之于大學為序不同其道則
 一記之遂曰小學之于大學為序不同其道則
 觀天下之理誠使幼學者用力乎孝弟忠信之
 行以及乎射御書數之藝及其長也由格物致

知以至於誠意而理無不明由正心脩身推而至于治國平天下而事無不格自塾庠至于序學教無不成人無不化今願求工於言語對偶之問其去聖賢塗轍益遠矣王朝以此得人賢所不廢也士無學師無教疾行先長望于速成豈惟小子之學根於孩提抑耄期稱道其為大人也能知進退存亡而不失其正者鮮矣安保其不欺官賣法以為天子之羞哉小學成始成終之教一言蔽之曰敬此心既無往而非明德新民之功豈惟士子所當盡力亦長吏所當盡心也公諱儔北海人

重建尋仙觀記

咸淳九年

虞國慶

溧水為昇望邑地隣茅山邑有尋仙門而無奉真之宇道流靡所集凡祈禳必邀諸尋仙觀觀去縣治兩舍隔無從寓目其間一山主觀事王道常袖石刻唐人仙壇銘來日觀依仙杏山

一名仙壇唐周垂拱間道士宋文幹因山形似修立仙壇長壽中邑令王君通遂以其鄉至聖曆中令岑君伸琢石為像道流益尊事之山之得名以此觀舊有記今不存真知所始我朝元豐間道士錢玉周以三清大殿廢願捐衣鉢資鼎新之不克就嗣之者苟慎琦場工選材矣又弗就臣宣和中周茂沔主觀事與吳混成者始克荆建崇奉邑人相與出力者儀鳳之趙三捷公武贊賢毛輿德載也迄今浸久又廢矣道常才主斯觀也與今同禡之馨囊募緣重建而公武之曾孫觀光賓甫亦慨然以堂構為已任捐資倡役無靳色以是諸方檀越善信懽然協力不日成勝事役且畢願以記為謁余以始至未暇辭期歲請益堅余曰觀之有殿幾何時圯由元豐至宣和幾何年而復由錢至周又幾何一人而成久廢而興既與復廢其難可知矣今幸一旦還舊余之來又適當其成是可知也攷之紀牒山去縣四十三里迺迺一

十餘里其高三十丈絕頂有杏林及仙人跡其
山舊名仙杏或又謂觀置於梁時地與茅山燕
洞隣上有石壇證之舊經以為茅君行道之所
時異景移不可究詰古謂山不在高有仙則名
是足以當之矣大槩仙之說自老氏其道以清
淨為宗慈儉為寶雖若離世獨立而未常無兼
利萬物之意聞其風者往往景慕興起亦良心
善性之所發也由今而觀鄉曰仙壇門曰尋仙
疑非所以為俗化之本而崇立倡率若王岑二
大夫或在位清勤戶口增益或德義仁威惟人
是愛在昔皆號賢令意者烹鮮之喻無欲無為
之訓言治者取焉而疑神合道微妙並觀殆難
以清虛素寂薄之也役興於咸淳七年三月成
于八年九月道常與其徒皆能振宗風于弗墜
實甫亦能續先志于有傳儻來者皆以是存心
俾勿壞則千載一日可也書而識之於以厚俗
於教未必無補云咸淳九年五月甲子日宣教
郎知建康溧水縣主管勸農營田公事兼兵馬

監押兼主管圩田兼弓
手寨兵軍正虞國慶記

元

唐禮部侍郎劉公祠記

津祐十

杜子源

太學進

溧水縣北之柘塘劉君有祠舊矣禴禘祈禱輒
響答端平丙申里民以梁撓將壓補敝且藻飾
之而鄉之著姓濮君知明首以義倡時嘉熙已
亥秋八月也利幾戎馬突至居靡遑寧其後因
以水旱田多汗萊不克于咸淳祐甲申乃始屬
役殫力竭慮若已作室雪眷朱扉林薄照映揣
高度廣視舊有加位置貌像舉以法故用洋如
在民益敬憚其子貴發求予記稽諸志乘及裴
晉公所著隧碑府君歸葬于鄉今縣北三十五
里曰劉墓者是也其門人韋乾度王良士鄭郡
合十餘人琢石為碑顏魯公敘送伯氏西遊亦
侈其鄂不華之盛晉魯二公元勳盛德日星儷

明千載聞風者歛衽而於府君稱道如是嗚呼
金陵古帝王州達官顯人累丘隴鮮有氏其地
者屋而祠之歷百千歲如一日君之德如此而
於汗簡獨甚約託晉公之筆以傳而又此不幸缺
裂敲礪之餘淪墜割烹之所非有賢大夫挈而
出之則其名行泯沒於蒼烟衰草間然則扶斷
刻於垢汗新廢祠於煨燼非
樂善神風化者其克以哉
嘉祐十六年

招雲亭記

至順辛未二月

謝瑛 陽夏

禪寂主人猷仲謀嗣金剛幢茂公正法者也住
院甫再期留大禳之餘乃能引墜起廢以為化
陋祛鄙之計於是傾笠包所儲新敷衍教戒之
堂若干楹鑿山開址出舊堂上十餘尺且即宇
後屠綦滅莽得古磴於數百年砂礫堙淤之中
直達於善財所禮大士之巖下若山靈布以默
相之者用構亭於其陽以招雲扁之空翠四環
縣瀑飛下游矚所及奇觀湧來一日具茗饌延

予其上乃界極夫雲之所歸趣而徵記焉予謂
雲無心物也設可招不幾乎有心也與得非以
其興也若乘時而起其歛也若順時而返雖無
心若有心也與然無心固不可招若有心亦不
易招今之欲招若雲也其矧而笑曰無心於有
素識於彼矣其矧而笑曰無心於有無者必能
於雲人也非雲即我我即雲也愛之斯即之即
之斯招之也此扁之所以揭也夫守道不如守官
虞人猶見重於孔子是雲之視我也夫豈若乎
齊田之旌也哉此吾之所以有取於彼也欲法
彼以進吾學予幸述以詵來者使知我之所以
道之也予善其言出吾書且非智者則不宜與之
契乎非道弘人之旨故為疏於左方就以為記
云
至順辛未二月

烏龍廟記

至元六年五月

許愉 州人

神姓張氏以其名廟廬山陽距州東二十五里漢元狩中以功德食於土以其變化不可測故名烏龍初欲立廟他所一日失其材明日得諸六七里外今廟所也於是鄉人益驚異樹立益顯敞合數郡淫雨者必禱焉禱必得歲載在祀典列著州乘凡所以澤民者甚厚至元甲戌温陽李侯知州事歲適旱侯禱於廟雨如注明年春夏秋又旱侯再禱輒雨侯之精誠通於神明而神愛侯之民與侯心甚相似也神於民厚矣而廟且壞又明年侯慨然謂愉曰若之先世致力於廟舊矣其無忘神功墜先績愉義不得辭乃經始於八月辛卯又明年冬十二月辛未而廟以成爲屋百楹一襲其舊不爲損增凡用錢一萬三千餘緡谷八百餘斛嗚呼夫世以禍福奔走愚蚩而且美其祠宇者皆是矣若神之福人宜享其報而其廟顧久而圯者何與以其能福而不能禍也非侯之愛民敬神斯廟何由而新耶乃鑱之石使後之事神者知神與侯愛民之心若此其至庶幾乎有所感發也

華勝寺羅漢記

曹國

佛氏入中國一郡一縣衆民之什一者蓋由其徒將有所出其餘以資其其或弟周則必惟大人長者之門是求以資其不逮才具既集則又壯者荷少者憐憐憐憐不倡而相先不亟而益奮於是蒼烟宿莽之區不數月而棟宇已秩秩乎可觀矣中山華勝寺在州南三里義興來穴并以飲行道於此居民食其如昔自爲嗣經度之匿遂成道場規備固不甚宏而宗廟折腐者圯延祐七年春法盛募之極者象此覆護之至儼如也惟羅漢尊者昔常附壁而爲壁壞不可存至元夏四月盛言

於衆曰寺右朱君得之檀越成焉君歲時募
 衣帽方支常謂余子曰吾將承之於娶原聞
 邦良匠多媿才身羅漢衆設未有施者
 答謀君曰以信誼間往往未欸容我聽衆
 善遂挾上足過來此間往之一曰二師不
 難萬山越重不言可知已卽以是月始
 事既就月越重觀者嘖嘖無已若夫佛之
 類佛者此然所感原乎所見而然也
 則哀者無他心之所動之則瞻仰者未必
 設教其嚴以警動之則瞻仰者未必
 盡其對越之誠而無愧今也余相巍巍如滿月
 中天法界星於左右者若在靈山親承
 正果莫不心領而神會則比登殿
 爲予敬懷焉慕當何如哉抑盛師
 者輒弗內持守如此是又可尚也得之名

龍飛戊寅春正

書篆額

行道

轉國

記并

圖書

國立中央圖書館藏

海
入
集
高

